

DIBÙCIKILA DYÀ ÉTATS-UNIS

...diswa dyà Mukalenge bwà bintu kampànda kwenzekabi ku misangu. Twêtù kuya ku Denver, ànu àbìdì adi pansi aa, ne kwalukila. Ndi ngèèla meeji ne ndi muswè kufilà lwàpôlù, lwà masangisha ne: Avwa àmwè à ku masangisha matàmba bwímpè ankaadiku mupete kùkaadi bidimu byàbûngì. Tuvwa bapetè cikondo cilengalèngààyì. Bantu bapicile ndambù pa binunu bìbìdì bavva bafile myoyi yàbò kùdì Kilistò, pa kuumusha aba bààkapeta dibàtiiza dyà Nyumà Mwímpè, katuyi tubala bimanyinu binène ne maalu à kukèma bìdi Mukalenge wetù munanga Yesù mwenzè munkaci mwà bantu mwàmwa mu Denver. Tuvwa ne dipòngoloka dinène, ne didisanga pàmwè dinène dyà bantu. Tuvwa babange ne bantu batwè ku binunu bitaanu, cyàkumpàla. Nènku tuvwa ku Mammoth Gardens. Kàdi mu dilòòlò diisâtù, kakùvvakù nànsha mwaba wà bantu kwimanabù to. Tuvwa bapicile mu cikondo cilengalèngààyì, cyà malòòlò átaanu.

² Twêtù kuumuka kuntwaku, bwà kuya ku Canada, ne nsongààlùmè wanyi ne mêmè. Nènku twêtù kubwela mu mikùnà, ke cipeepèlè cyà nèjè kulwaci. Ndi ncinka ne nuvwa bùmvwè bwalu abu, ku bisanjì byènù. Ne bantu batwè ku lukàmà ne makumi mwandamukùlù ne mwandamukùlù bavva bafwèmu. Nènku tuvwa bakàlamija mu nèjè munda mwà—mwà—mwà matükù àbûngì, kuulu kwà mikùnà kwàka. Ke matuku àà disangisha dyètù kupitawù, ki kutükèngelabi, bwà twêtù kwalukila kumbèlu mpindyewu, kumpàla kwà twêtù kuumuka kàbidi. Pa nànkü tudi twitatuuja ne byònsò abi bivva pàmwàpa bwà diswa dyà Nzambi, bwà ne neikale ma—masangisha matàmbe bwímpè, ne bikwàbò bintu kàbidi. Yéyè ùvwa ne cintu kampànda cimana kulongolola bwètù twêtù citùdi katuyi bamanyè to.

³ Tudi bu bàdì twendela mu buloba bwà mifitù, kàdi kî mmu mifitù to. Tudi ànu twenda tulonda, mùyaayà Bukénkè amu, díbà adi tudi twenda tulonda Bukénkè.

⁴ Nènku Taatù Wetù wa mu Dyulu pàmwàpa ùvwa ne cintu kampànda citùdi twêtù katuyi bamanyè bwalu bwàcì nànsha. Kùvwa kufwànyine kwikalà njiwù kampànda yìsanganyiibwa kumpàla kwàka. Anyì, kàbidi, Yéyè ùvwa mu fwànyine kwikalà munkaci mwà kukwàta mudimu pa muntu kampànda wa kutwàla. Nudi numònà's, Nzambi ùdi mwà kukwàta mudimu ànu ne muntu umwèpelè mûshindù awu; Üshintulula ditùnga dijimà ànu bwà muntu umwèpelè awu, bwà kubàbwejamù. Ne pa nànkü tudi bamanyè ne cyònsò cìvwa bwà butùmbì bwímpè bwà Nzambi. Nènku tudi tuMusàkidila bwà bwalu abu, ne bwà kutükùba. Nènku kùvwa bààbûngì, tudi . . .

⁵ Billy ne mêmè twêtù e kubàkwàcisha bwà kubàkòka, mu njila mujimà amu ne bintu byà mùshindù awu, bantu bàvwà ne tûshinyì tupete njiwù ne bikwàbò byônsò. Kàdi twêtù twakapàtukamù kakuyì lutàtu nànsha lukesè to. Tuvwa bapàtuke mu njila musangù ùmwè, kàdi aci cìvwa ànu bwà katancì kakesè cyanàànà. Kàdi muntu kampànda kuntwaku, mu madimi maalàbàle kulwayè e kutùkòka ne katùmbà. Ànu munkaci mwà kusenunuka; kùvwa busenù bwàbûngì be.

⁶ Kàdi cìvwa cìmwè cyà ku bintu bìvvwàbo kabàyì bapete ntàntà mule... kabàvvwakù mwà, bantu bakole kabàvvwakù mwà kuvùluka ne bàkaatukù bapetè cipeepèlè cikolè cyà mùshindù awu, mu ditunga amu, mu cikondo cyà cidimu aci, mu Roundup, mu Montana nànsha. Nènku tuvwa... Tudi bamanyè ne cintu kampàndà cyà pabwàci menemene mùshindù awu, Mukalenge wetù ûvwa ne cyanza Cyèndè mwômù mushindu kampànda. Bìvwa bwà kiipàcilà kampànda, bwà—bwà dyàkalengèlè dyètù. Bwà dyàkalengèlè dyètù, ki kabingilà nkwohkò aku.

⁷ Ki mêmè kubiìkila Mwanèètù Neville, paanyimà pàà mêmè mananè kwalukila, mêmè kwamba ne: “Nêngìkalè kumbèlu mu dyàlumingu. Nènku—nènku bu wêwè muswà bwà mêmè, kupweka ne pàmwàpa kwangata kàlaasà kàà Dyàlumingu, mònà’s, nebiìkale bîmpè.” Ki mêmè kwamba ne: “Dibà adi nêngìkalè... ne nêngìkalè ne disankà dyàbûngì dyà kufikakù.”

⁸ Yèyè ne: “Mònà’s, bushùwà’s, Mwanèètù Bill.” Kwambayè ne: “Tudi ànu ne disàンka be bwà wêwè kulwa,” ne mwoyi munène munzulula ne mwakidilu mulenga, mùshindù awu. Ne pashìishe kucipicishayè ku ndongamu wendè wa ku cisanji, makèèlèlà awu. Pa nànku tudi ne kusàkidila bwà bintu byônsò ebi.

⁹ Nènku mu dìndà emu, mpindyewu, bu mùdibi ne n’Ditùkù dyà Maamù. Bantu bàbûngì, nenuumywe mayiisha à Ditùkù Dyà Maamù myaba yônso, ne bantu bààkula bwà maamù, cîndì ngèèla meeji ne ncîmpè be. Tùtekààyi aci ku luseka bwà citùpà cyà masangisha cyàlonda.

¹⁰ Mu dìndà emu mvwa mumanyishe, ne, cye—cyena bwalu cyà Dibùcikila Dyà États-Unis, ki cîmvwà muswè kwakulapù. Bwalu, nuvwa pangâpa buumywe ndongamu wa ku bisanji byènù, ne nenùbyumywe byàbûngì leelù ewu. Nènku nekwìkale diyiisha dyà Ditùkù dyà Maamù, pàmwàpa, dildòlò edi mu masangisha. Nènku ki mêmè kudyàmbidila ne, mu dìndà emu, ndi mufwànyine kumanyisha ne: “di—dibùcikila.”

¹¹ Mvwa mwakùlepu ku Denver, ashààdi aa, kabiyì ànu menemene mu mùshindù ûndì ngiìpacila bwà kucifila mu dìndà emu to, bu Nzambi mwà kuswà. Nènku, cìvwa, tuvwa bapicile naaci mu cikondo cilengele be. Mukalenge ûvwa ànu mutùbènèshe mu mùshindù mulenga be. Cidi misangu mikwàbò citùpèèsheku... .

¹² Nudikù ànu ne cyà kunyùkishiibwa ndambù, bwà kujingulula cìdì maalu, kí mmwômo anyi, misangu mikwàbò? Nènku tudi tulòmba bwà Nzambì wàcyènzkàù.

¹³ Nènku, byôbì biine, kuntwaku, patwàkajikijà... Beena kantu-ku-Byanza bàà mu Denver ki bàvvà batùùdile masangisha awu mfranga, nènku cìvwa cishìllàngàne kakesè ne ditùùla dyà mfranga dînkaatùku mupete kwônsò eku.

¹⁴ Kàdi pa ciibidilu, bambi, pàdìbo bâtuùdila masangisha mfranga, nenwambe ne... “Nuvwa bamanyishe bwalu abu anyi?” “Eyo, kùdì èkèleeziyà.” Aci’s cìdi ànu bu cijikila. Mbalami bàà mikòòkò; mbaswè bwà mikòòkò yàbo kucimanyayì. Aci’s cìdi ànu mwâkù mulenga. Ki bwalu bwàbò mbôbò abu.

¹⁵ Kàdi Beena kantu-ku-Byanza bàvvwa bôbò bashìllàngàne ndambù; Bâvwa bôbò baswè bwà bàà pa buloba kucimanyabo, pa nànku bâkeelamù ndola mitwè ku binunu bisâtù anyi binaayi ku dimanyisha ku tùshinyi twônsò, tuutaxi, ku mûlù wônsò à tùshinyi, myaba yônsò; Tuvwa bapicile mu cikondo cilengalèngàayi.

¹⁶ Paanyimà pàà disangisha dimanè kujika, kumbiìkidilabò ku luseke, bàamba ne: “Mwanèètù Branham, citùdì mwà kukwenzela ncinyi mpindyewu? Tudi neebè dibànzà dyà bûngì kaayi?”

¹⁷ Mêmè ne: “Mònà’s, mu bushùwà bwà bwalu, kí ndyà cintu nànsha cìmwè to.” Mêmè ne: “Kanwêna naanyi dibànzà dyà cintu nànsha cìmwè to.” Mêmè ne: “Nwénù, mfucilaayi mushinga wà ku cilààlà-beenyi, mwaba ewu, panwìkale baswà.”

¹⁸ “Kaa, tudikù baswè bwà kukwenzela cintu kampànda.” Kàdi kabàvvakù bafwànyine... ncivwakù mufwànyine kwangata cintu kùdibo nànsha.

¹⁹ Ki mulongolodi wa ndongamu kubàkùngwijayè. Kwambayè ne: “Ndi ngéèla meeji ne yéyè ùtukù munange kulemba ne kulòba, kí mmwômo anyi?”

Yéyè ne: “Èywà.”

²⁰ Ki umwe wa ku beena kantu-ku-byanza uvwa ne madimi maalàbàle kuntwaku, e kwambayè ne: “Mêmè nemmupèèshèwu ànu bu màtâpishi.”

²¹ Èè, Mukalenge Moore kubàndayè bwà kuàmònayè. Ùvwa ne cyà kwalukila ntàntà wa kilômètè makumi àtaanu ne yisambòmbò, mubànde paanyimà pàà kàbalù. Mêmè kwamba... Mukalenge Moore kwambayè ne: “Ndi muswè kumònà Mwanèètù wa bakàjì Branham musòmbe pa kabalù, ùya kuntwaku.” Pa nànku yéyè, bôbò, ne...

²² Kàdi, paanyimà pàà cyòcì aci, nànsha nànku, bôbò kuya kuntwaku ku ferme ku Silver Plume, mu Colorado. Eci cidi ne cyà kwikala ku luseke elu mpindyewu. Ki kusùmbabò kaa cipaapu kakesè kàà budimi kuntwaku, e kungaashilabò nzùbu wa bibambalu bïtaanu kuntwaku mpindyewu bwà...

ku Silver Plume, mu Colorado, mwinè amu munkàcìnkaci mwà mikùnà. Pa nànku, nwêñu balobi bàà mishipa, ngèèla meeji ne ncikondo címpè, pa nànku ncifwànyìne kwikalà mwaba mwîmpè wà kwikishila, ne paanyimà pàà masangisha ne bikwàbò, bu Nzambì mwà kwanyisha. Aci ncimutàngile Yéyè, nudi numònà's.

²³ Ndi njinga mpindyewu kukoka ntèmà yètù ku Dîyì. Nènku ndi ànu munange Dîyì, Dîyì dìdì ne mwoyi dyà Nzambì. Dìdì, munda mwà Dîyì mùdi Mwoyi. Mpindyewu: "Dîyì, dileetà, dìtu dishebeya, kàdì Nyumà ngudi ufila Mwoyi." Ne Mwoyi wùdi mu Dîyì, bwalu n'Dîyì dyà Nzambì. Mwoyi wùdi wùsanganyiibwa mu Dîyì Dyèndè.

Cileejilu bu mêmè mwà kukwambila ne: "Ndi nkupèèsha . . ."

²⁴ Wêwè udi wamba ne: "Ndi ne nzala, mu dìndà emu, Mwanèètù Branham. Udkù mwà kumpà ndola yìtaanu anyi?"

²⁵ Ndi mufwànyìne kwamba ne: "Mêmè nêncyzè." Mpindyewu, kùdi mwoyi mu cyôci aci ànu bûngì budìwu mu mulayì wànyì.

²⁶ Ke mùshindù ùdibi kùdi Nzambì. Pàdì Nzambì ûlaya cintu kanà cyônsò, dîbà adi cìdì Nzambì aci, Dyèndè . . . Bikèngela ikalè mu Dîyì Dyèndè. Nwamònù anyì? Dîyì edi kadyéna mushinga . . . Dîyì edi dìdì ànu mwômùmwè ne Nzambì. Dìdì Nzambi.

²⁷ Dîyì dyèbè ke cyûdì. Ke cìdì cìkuswìka; mutùvwà ne ciibidilu cyà kucibìkila. Cìdì cìkuswika ndiyì dyèbè. Twêtù katuyì mwà kwangata dîyì dyèbè to, dîbà adi ncyéna mwà kwikalà ne dyeyemena to. Kàdì mêmè mwà kwangata dîyì dyèbè bwà cintu kanà cyônsò, dîbà adi mmuntu wa luumù.

²⁸ Ne Bible mmwambe ne: "Ku cibangidilu kwàkadi Dîyì, ne Dîyì dyàkadi ne Nzambì, ne Dîyì dyàkadi Nzambì." Nwamònù anyì? Nwamònù anyì? "Ne Dîyì dyàkavwijiibwa mubidi, ne dyàkasòmbela munkaci mwètù."

²⁹ Bu twêtù mwà kwela meeji, nùnku, buloba mene mutùdì basòmbèle emu, mu dìndà emu, n'Dîyì dyà Nzambì. Muci wàwa n'Dîyì dyà Nzambì. Ne wêwè, mubidi wèbè, n'Dîyì dyà Nzambì. Nzambì wàkamba dîyì e kufùkiibwawù mùshindù awu, muwènze kakuyì ku cintu nànsha címwè to; pàvvàku kakuyì cintu nànsha.

³⁰ Nukààdikù bamònè ne mwoyi wà muntu ewu, mmufùmìne penyì anyì? Kabulu kàmwè kakesè kàà mashì, kakesè menemene mu mùshindù wà ne dísú dyà muntu kadiyì mwà kukàmònà to; ànu ku lumwènu lunène, lwà bukolè bwàbûngì. Kàdì mu kwôkò aku mùpàtuka muntu wa bujitu bwà kilô makumi àsambòmbò ne mwandamukùlù, makumi citèèmà. Aci ncifùmìne penyì? Nwamònù anyì? Nzambì ûvwa ànu mucyàmbe, nènku ki kutwàdijacì, ku bufùki, cyènda cìkola, ki cyôci aci kutwàla

ànu menemene. Wàkamba dîyì mucì wônsò kwikalawùku, cintu cyônsò, kwikalanganakù. Nènku ncintu cilenga be, cintu cilenga cyà dikèma, mu dindà emu, bwà kutàngila Dîyì dyà Nzambì.

³¹ Mpindyewu, eci, mu dindà emu, mu Dipungila Dikùlukulu, tubuulula mu Kulondolola. Mvwa mwenze bu musalùkekù ndambù... Panùcidì nubuulula mu Kulondolola, nshapità wa 18 apu. Ndi mucyòkè ànu ndambù. Kàdi bu Mukalenga mwà kuswà...

³² Neyéna mutwìshìibwe to; netùmanyè byàbûngì mu diisâtù dilòòlò. Bu Mukalenge mwà kwanyisha, ne èkèleeyiyà ùdyùmvwa mulombòdiiibwe mùshindù awu, ndi muswè kwangata diisâtù, diinâyì, diitânù, diisambòmbò ne dyàlumingu, bu ditàbuluja kaaba aka, ànu ditàbuluja dyà dilongesha cyanàànà mu Dîyì. [Disangisha dìdi dyàmba ne: "Amen."—Muf.] Diisâtù, diinâyì, diitânù, diisambòmbò, ne dyàlumingu, ànu bwà kulongesha pa Dîyì; kabiyì bwà masangisha à dyondopa nànsha, kàdi dilongesha. Pàmwàpa Mukalenge neàtùlombòlè mùshindù awu. Ne pashìishe tudi...ndi ànu munangè bwà kwikala neenù ne kwenza bwobùmwè ku nyùngùlukilu wa Dîyì, pàmwè neenù. Twasàkidilaayi, wa bûngì, bwà "amen" wenù mwîmpè, mulenga wa dikema awu.

³³ Mpindyewu, mu nshapità wa 18 wa Kulondolola, ne kubangila ku mvensà wa 12, tudi tujinga kushìndikila meeji ètù, ànu bwà katancì kakesè cyanàànà pa cyena bwalu cyà mushinga mukolè cyà ditükù edi. Kulondolola wa kumpàl-... anyì, Kulondolola Mwibidì, mfwilaayikù luse, Kulondolola Mwibidì 18.12, nènku netùbalè citùpà cyèndè mwab'ewu, ne kumònà ciikala Mukalenge wetù muswè bwà twétù kumanya.

Nènku ki mùsanjeela wàkaya kabìikila Miikà kwakulayè nendè, wàmba ne: Tàngilà, mèyì à baprofeta àdi àmaba bîmpè byà mfùmù ne meeji àmwè; anyishà bwà dîyì dyébè dìbà adi, nyéwù nkusèngelela, yìkalè bu dimwè dyà ku ààbò, ne wàkulè bîmpè.

Ke Miikà kwamba ne: Bu mùdì MUKALENGE ne mwoyi, ànu cyàmbà Nzambì wanyì aci, ke cingàmbà.

Kàdi pààkalwàye kùdì mfùmù, mfùmù kumwambilayè ne: Miikà, tuyé ku Lamôtà-giladà bwà kulwangana mvitâ, anyì tûbengè bwà kuya? Ki kwambajè ne: Bàndaayi, nùkàtùtè dyàkalengèle, ne bôbò nebàfidiiibwè mu cyanza cyèbè.

³⁴ Mpindyewu, bwà kushìndamijila meeji ètù bwà katancì kakesè; ànu dîyì dìmwepelè cyanàànà kùdì Ye cyákàbìdì, pa cyôcì eci.

³⁵ Taatù Wetù wa mu Dyulu, ne myoyi yà kusàkidila ntwêtù aba tuseemena Kûdì mpindyewu mene, bwà misùùkà mijimìnè, bwà aba bàdì mu lukèngelu, bwà èkèleeyiyà. Bwà, wànyishèku bwà Nyumà Mwîmpè àbwelè mu Dîyì lùkàsàlùkàsà mpindyewu,

tudi tulòmba. ÀDìbwejèku buludi mu mwoyi wônsò ùdì ne dijinga kaaba aka. Nènku pààfilà Ye Mukenji Wèndè wà bukolè wà Dîyî munda mwà mwoyi, twásongelakù bônsò nkèlà ku Wôwò awu, mu dìndà emu; twenda tuya, tushìya tabernacle, twenda tucyònkomoka ne tutùmbisha Nzambì, twamba ne: “Myoyi yètù yìdi yìlákuka munda mwètù, bwalu bwà Bwikadi Bwèndè.” Bwalu tudi tulòmba nùnku mu Dînà Dyèndè. Amen.

³⁶ Cyalu cyètù ncishindàmèène, mu dìndà emu, pa bwalu kashondo. Ne Dipungila Dikùlukulu, bwànyì mêmè, dìtu ànu mundidimbì anyì di—anyì didyànjila kuleejiiwbwa dyà Dipungila Dipyadìpyà. Misangu yàbûngì, mutu ùtu wamba ne: “Mwanèètù Branham, bwà cinyì utu wêwè misangu yônsò ànu wangata Dipungila Dikùlukulu? Pàmwè ne misangu yônsò, mu dyangata dyà cyena-bwalu, udi upingana mu Dipungila Dikùlukulu.” Ntu ngènza nànku bwalu ntu muswè difwànyikija. Ntu muswè...

³⁷ Dilonga dyànyì dyà kàlaasà nditàmbe kushààdila, ànu munùdì bônsò bamanyè. Mùshindù ùmwépelè ûndì mumanyè wà kwikalà pabwípì ne cìdì mu cyòcì, ngwà kumòna cìvwà citembelu, bwà kutàngila cifündu ne kumòna cìvwàcì. Nènku dìbà adi ndi mmanya cìvwà *cyòcì aci* necikalè cintu cìfwàñangane ne cìdì apa *eci*, bwalu cìdì ànu mundidimbì wàcì. Nènku ntu ngwòsha dísù paanyimà misangu yônsò mu Dipungila Dikùlukulu bwà kumòna cyàkenzà bânà bàà Izàlèèlè, kumòna cìvwà dinyoka dyà mpèkaatù, kumòna cìvwà bwakàne bwà baprófetà, kumòna cìvwà bintu byônsò abi; nènku dìbà adi nempetè cingènyingenyi cyà *eci* cìdì apa, cìvwà cidyànjila kuleeja mu mundidimbì wà ciikalàku ku nshiikidilu wa byônsò ku ndekeelu.

³⁸ Mu cikondo eci, kùvvwa cintu cinène cyàkenzekelà Izàlèèlè. Cìvwa mmu mìdimà yà mundankùlù.

³⁹ Mu Dipungila Dikùlukulu, bu Mukalenge mwà kwanyisha, pàmwàpa mu masangisha àlwålwa, ndi muswè kuleeja mùshindù ùvvà Bikondo Mwandamutekète byà Èkèleeyiyà bifwànyìkjìibwe mu Dipungila Dikùlukulu. Mùshindù wàkabangàbo ànu menemene bu ku—ku cibangidilu cyà Bikondo byà Èkèleeyiyà wa bàà Bisàmbà byà bendè, ne kupìcila buludi mu cikondo cìfwàñangàne cyà mìdimà, kupàtukamù e kubwela mu cikondo cyà butùmbi cyà Mpenta, ku dipweka dyà Nyumà Mwimpè mu èkèleeyiyà wa ku cibangidilu wa...mu cipungu cyà beena Yudà. Pashìishe kupicila mu cikondo cikwàbò cyà èkèleeyiyà wa bàà Bisàmbà byà bendè, kupicila mu cikondo cyà mìdimà, ne pashìishe kupàtuka cyàkàbìdì mu Bukalenge bwà bidimu cinunu, ku ndekeelu.

⁴⁰ Mpindyewu, mùshindù ùvvàbi ne kale wàwa mu nkàmà ya bidimu yà munkaci ayi, mfùmù munène ewu Aakàbà kubwelayè mu bukalenge. Kàdi ùvwa mwenzè ànu bu uvwa

wendela mu luumù lwà bamfùmù bakwàbò bàà Izàlèèlà, biinè àvwà... Aakàbà, yéyè mwine, ùvwa mwenzè bu mwena—mwena kwitabuuja wa ku mikàlu. Ntu dìbà dyônsò mmubala ànu mùshindù awu, bwalu ùvwa muntaci ewu ùsanganyiibwa dyàmìneemu dyà lupangu, muntaci mukwàbò ùsanganyiibwa dyàmwàmwa dyà lupangu.

⁴¹ Kùvvakù mwà kumanya nànsha kakesè mwaba wà kwimanyina, ne muntu wa kàyì mutwè makàsà pansiò mùshindù awu. Anyì, muntu udi wamba ne mmwena Kilistò, kàdi kàyì mutwè makàsà pansiò, kwena mumanyè cyà dyenza ne muntu awu to. Leelù ewu mmwena Kilistò; mààlabà kwêna umanya ne ùdi penyi to. Mu èkèleeyià leelù ewu, ùcyònkomoka ne wìmba misambu ne ùtùmbisha Nzambì; kàdi mààlabà, ùpàtuka úkanwà maalà, wàkula bwakùlìvì, ùnyemakana wàtwa eku ne eku. Dìbà adi muntu wa mùshindù awu mbìkolè bwà kwenza nendè cintu.

⁴² Ndi mvìluka, pâncìvwà nsongààlùmè, musangu kampànda tuvwa ne kàbalù kàà—kàà kale, kàvvà ne ciibidilu cyà kutùpika mpangu misangu yônsò. Nènku ndi ngèèla meeji ne bâàbûngi bâà kunùdi nwénù bantu balùme, bâà mulongo wànyì ewu, nudi bafwànyìne kumanya kale wàwa mu matùkù à tûbalù, matùkù à matempu. Ntu mupwekèpwèke ne mùsèsù ewu, misangu mivulè, ngèndesa kàbalù nkòka ditempu, mêmè mwine. Ndi ne bidimu makumi ànaayi ne bitaanù. pa nànku, bàvwa... Ndi mvìluka, kàbalù kàà kale aka, tuvwa tukàtenteka cikòkedi ku nshìngù, munùdì mwà kutenteka ngombe amu, bwà kukàpangisha bwà kutùpika cimanu. Kàdi nànsha nànku kàvwa ànu kàtùpika. Ne kàvwa kafwànyìne kulembeleja cikòkedi aci ne kucítòncola, ne bikwàbò. Kàvwa kàsambuka lupangu. Nènku dìngà ditùkù, dìvvàku...

⁴³ Mvwa ndikonka ciìvwà cikòka kalùmyànà kàà kale aku ntèmà. Kàdi kùvvwa ciina cinène lwà kwinshi aku. Mpindyewu, kàvwa kiimàne mu lutende, kaa, lutùmbùke, kàdi kàvwa kaswè... Kàdi kùvvwa àmwè mabèji à mashìndà mu ciinà kampànda aci. Kàdi kutùpikakù lupangu alu ne kubwelakù mu ciinà mùvvà nkànu yônsò eyi ne bìlàngilàngì, mwaba ùtùvvwà... mu cyètù—cyètù ciinà cyà bucyañfù, kubwelamù ànu bwà kudyapulakù ndambu wa bisonsà byà mashìndà awu. Kàdi byàkatùkèngela tûmwè tûbalù bwà kukàpâtula mu ciinà aci. Pàkabwelàku muntwamu, kààkakàlamamù. Kàdi pààkapâtukàku muntwamu, kàvwa kàzakalala ne kàzonza mashi, ne—ne mùshindù mene ùvvwàku, ànu bwà kubàkulakù ditàmà ntèntè dyà mashìndà, anyì àbidi, pààkù kiimàne mu lutende, lwàmbà kukàfikila mu binù.

⁴⁴ Ntu mwelèle meeji misangu mivule ku cimfwànyì aci. “Njila wa mushipi wa mikensi mmukolè.” Kakàvwa ànu kafwànyìne kushààla kapòlòbele ànu kaaba kàvvwaku munkaci mwà kudyà aku kiikàle kàcyonkomoka nànsha, kàdi... kàvwa ànu ne cyà

kutùpika lupangu alu ne kuya kafyondoka kônsò ne kutàpika mùshindù awu, ànu bwà kûja matàmà musangu umwe ne mashinda à—à mûngà mùshindù mushìllàngànè. Mpindyewu, awu's ke mùshindù ùsòmbèlè ànu bantu bènza, batùpika ànu lupangu lwà mpàta wa lutende lwà Nzambì. Kanwènaku nwitabuuja aci anyì? Bâpàtuka, bâpàtuka leelù; bàbwela. Mu èkèleeyìyà, bâpìcila mu cikondo cilengèle; pashiishe, mààlabà, bàkacìshintakaja ne cintu kampànda cyà mùshindù awu aci. Cìdi citàmba kucìkolesha.

⁴⁵ Aakàbà ùwwa ànu bu muntu wa mùshindù awu. Kwônsò kùvvà luopepèlè lùtuuta, ki kùvwa Aakàbà úya, ní kùvwa ku *elu* lusèke anyi lusèke *lwàlwà* lusèke. Dibàkà dyèndè dyàkamubweja mu cimvundù, ne mukàjì mukesè uvwa mwânà wa bakàjì mukesè wa mfùmù, mwânà wa bakàjì wa mfùmù, Izàbèlè kampànda. Mulengèle kumònà menemene, mukàjì mulengèle wa njàjàjmà, kàdi mu mwoyi wèndè ùwwa mubyaamùbyale. Kàbìdì ùwwa mutèndèleedi wa mpìngù, wàkafikisha Izàlèèlè mujimà . . .

⁴⁶ Mpindyewu, mùshindù mwinè ûmvw'â kujinga kwoyilapù ànu bwà tusunsa tukesè, mutùdì mwa kwamba, mu kubwela mu ndondo wa bumaamù ebu, nwamònú's, mwab'awu. Nènku pàkaadi muntu ùkèba bwà kubwela mu dibàkà; mùshindù wà nsongààkàjì, mukàjì wîkalayè. . . Ncipite ne kutàngila ànu ku bulenga bwà kwîsù. Bìdi bikukèngela bwà kupeta muntu udi, byônsò ne musùùkà ne mubidi bisangisha pàmwè; muntu wîkala menemene mulunda webè ne nyààneebè, wâswìkakana neebè mu ntàtu ne mu masànkà.

⁴⁷ Mpindyewu, kàdi, Aakàbà, wàkamunanga ànu bwalu ùwwa mulenga kumònà, ngèèla meeji, ne kumusèlayè. Kakùvwa mwà kwikalà cîngà cintu mu yéyè to, bwalu, ne cikisu cyônsò cìvwàye naaci aci's. Nènku mukàjì awu kulwaye kuntwaku. Nènku dîbà adi, mu bushùwà bwà bwalu, bu mùvvwàye muswìkàkane nendè mùshindù awu, kàbìdì mumunange, mònà's, wàkafikisha Izàlèèlè mujimà ku dyenza mpèkaatù ne kudikàndameena Nzambì, ne kutònkola byoshelu byà Nzambì; kwibaka byoshelu byà Baalà. Nènku bààkatèndèleelè Baalà mu Izàlèèlè mujimà, mwine musangu awu.

⁴⁸ Mpindyewu mukàjèndè wàkafikisha Nabòtà mwakàne awu. . . Bâàbûngì bàà kunùdì mbabalè bwalu bwèndè. Mùshindù wàkangatàye budimi bwèndè, ku mashimi; ku didicipa, byà mashimi, ne kumukèbelà bantèmù bàà mashimi bwà kumushiminayinabò maalu. Bwalu, ùwwa muswè kwenzela bâyendè cintu kampànda; kàdi kushipa muntu mwakàne, ànu bwà kupeta budimi bùvvwà bulamàkàne ne lupangu lwà nzùbu wa bukalenge.

⁴⁹ Byônsò ebi, Nzambì ùwwa mutàngile pansi. Nànku ke muprófetà, Eliyà, uvwa musadidi munène, wa bukolè wa Mukalenge awu, kwambaye ciprófetà e kwambila Izàbèlè cìvwà

ne cyà kumwenzekela. Ki kwambilayè Aakàbà ne mbwa ìvwa ne cyà kulàka mashì èndè. Mpindyewu, pàdì Nzambì mwambè cintu kampànda... Mu bushùwà bwà bwalu, matùkù awu, Dìyì dyà Mukalenge dìvwa dìlwila buludi kùdì mupròfetà.

⁵⁰ “Nzambì, mu bikondo byà kale ne mu mìshindù mishìlèshìlàngànè wàkàakwila ne baataatù kùdì bapròfetà, mu ditùkù dyà ndekeelu edi ku Mwan’Èndè, Kilistò Yesù.”

⁵¹ Pa nànku, *Edi* n’Dìyì. Nènku pììkalà cintu kampànda cibèngangana ne *Dyôdì*, cilekela. Nwamònù anyì? Mpindyewu, cintu ciibidì, Yéyè ùdi wàkwila leelù ewu ku mupròfètà, mwena lùmònù, ne bikwàbò. Kàdi cyà kumpàla *nCyôcì eci*, Dìyì. Mpindyewu...

⁵² Kàdi Aakàbà ùvwa mwenze cikisu eci. Ne wàkatùngunuka; Nzambì kubènèshayè bantu munda mwà bidimu byàbûngì. Nènku, ndekeelu wa byônsò, Yéhoshàfàtà ùvwa mfùmù kumutù kwà Yudà, pàvwà Aakàbà mfùmù kumutù kwà Izàlèèlè apu.

⁵³ Nènku, dìbà adi, Yéhoshàfàtà ùvwa muntu mwakàne. Ùvwa mwânà wa Asà. Asà ùvwa mwa—muntu mwakàne, ne wàkashimbula byoshelu byônsò byà—byà mpìngù abi; kwibakulula byoshelu byà Yéhowàh. Nènku bàvwa munkaci mwà kwenza di—ditàbùluja, bu mùvvwàbì, mu Yudà mwàmwa.

⁵⁴ Ne pashìishe paanyimà pàà katancì, Yéhoshàfàtà, anyì Aakàbà’s wè, kutùmayè mukenji, ne kujandulayè katùpà kakwàbò kàà buloba, mu Suuliyà, kàvvwàye wela meeji ne kàvvwa kèndè, kàvvwàye wèla meeji ne neàye kakàngata. Nànku ki kukonkayè Yéhoshàfàtà ewu ní ùvvà mwà kulwa kwenza nendè cipungidi.

⁵⁵ Nènku, mu bushùwà bwà bwalu, kùdì njìwù minène mpindyewu, nwamònù’s, pààkamònàbo mfùmù munène ewu, Aakàbà, kuntwaku, ne bâàkamònà munène ewu kaaba aka, Yéhoshàfàtà; umwe wa kùdìbo, wa civùmvù; mukwàbò, muntu mûle tèntè ne Nyumà. Tàbàleelààyi munùdì nwenza cipungidi cyènù. Tàbàleelààyi cinùdì munkaci mwà kwenza, munùdì nuswìkàkana nwènù biinè mu cikòòkedi ne beena bupidyà. Dìlamààyi nwènù biinè bakezùke, nangànangà mu ditùkù ditùdì ne mwoyi edi.

⁵⁶ Ndi ngìtabuuja, èkèleезiyà, kakùyì mpatà nànsha mikesè ne, eci cìdì cilàkuka mu mwoyi wànyì. Ki bwà cinyi ndì nkeba malòòlò àtaanu aa, mu katancì kakesè emu; bwà musangu ewu kàbìdì, kumpàla kwà cyôcì kwenzekaci, kupèèsha èkèleезiyà ewu ditàngìlula mu kaabujimà, mu Bible.

⁵⁷ Tudi ne mwoyi mu mindidimbì yà cikondo. Cìdi mwà kwenzekà dìbà kanà dyônsò. Patùdì tutmònà bikondo bìlwa bwà bintu kwenzekabì; lonji mene lwà mwena lukunà, makolè mene. Tudi tumònà bipeepèlè byà nêjè ebi ne bintu byônsò munkaci mwà kwenzekà, bikupi, ne bintu byônsò bishìlèngànè. Byônsò abi mbilela kùdì dinyanguka dyônsò edi, byà dituuta dyà

maabômbè ne bikwàbò. Bâdi munkaci mwà kusopakajangana bintu mwab'ewu. Nènku bâdi munkaci mwà kunyangakaja mu cizaba cinène cyà Nzambì, bwà kukùmbaja Diyì Dyèndè. Necyènzekè.

⁵⁸ Pa nàngu: "muntu wa mpèkaatù" ùjuuka, bukolè, ne diseeswishangana dikolè. Ekèlekèle. Mêmè kuumvwa mwambi mu dìndà emu, muntu mûle tèntè ne Nyumà, kwangata cimanyinu cyà nyama wa lwonji ne kwamba ne mufwilakanyi ne Kilistò ùvwa Russie. Cilèmà kaayì. Uh-huh. Russie kêna ne cyà dyenzamù to. To, mukalenge. Aci's ki Mifündu. Mpindyewu, kâdi mònaayi mu cikondo cinène citùdì ne mwoyi eci, didìmwija.

⁵⁹ Mpindyewu, Yéhoshàfâtà ewu, mwikàle udyùmvwa bîmpè ndambù bwalu mfùmù munène wa Izàlèèlà ùvwa mwambe ne: "Lwâku, ùngendèlèku." Ki kupwekayè kuntwaku. Ki kukwàtabò ngombe ne mìkòòkò, ne bikwàbò, kufila mulàmbù. Dîbà dyônsò, mu mwoyi wa Aakàbà mwàmwa, yêyè ùvwa museeswishanganyi, bwalu kàvwa úkukwila aci to...anyì ùlàmbula mìkòòkò ayi ne bikwàbò ne mwoyi mulelèlà to, bwalu, ndekeelu wa byônsò, wàkatàmba kushindameena pa ntèndèleelu wa mukàjèndé.

⁶⁰ Nènku mònaayi, ànu muvwa Aakàbà musèle Izàbèlè mu cikondo cyà cikondo cinène cyà mîdimà cyà Izàlèèlè aci, wàkabweja dikuukwila dyà mpìngù mu Izàlèèlè, cifwànyikijilu menemene cyà leelù ewu. Ànu mu cikondo cyà mîdimà; patùdì tupìcila mu bàpostòlò bàà ku cibangidilu abu, cipungu ciibidì, cipungu ciisâtu, lwà mu cikondo cyà mîdimà, bidimu cinunu ne nkàmà yitaanu abi. Ànu mwàkasèlè Aakàbà Izàbèlè ne kubweja ditèndèleela dyà mpìngù mu Izàlèèlè amu, ki mwàkasèlè èkèleeziyà wa Nyumà Mwîmpè kubwela mu tusùmbù, ne kwaluja dikuukwila dyà mpìngù, ne leelù ewu ncimwènekelu cyà bwena Kilistò. Nwamònù anyi? Nwamònù's, ànu mîdimà yà menemene. Nènku mpindyewu mbitùngùnuke, ditùkù dyônsò; cikondo cyônsò cyà èkèleeziyà ncitùngùnuke citàngile ànu ku cintu cimwècimwè aci ku katòngòbèlè kanène aku, ku ngiikàdilù wa civùmvù ubi ulwa, Cikondo cyà Èkèleeziyà wa Laòdikìyà. Kaa, dîbà kaayì dyà dikwàcisha bwôwa ditùdîmu ne mwoyi edi.

⁶¹ Tèèlejààyi. Ndi muswè kutonda kaaba aka mene, kumpàlè kwà mêmè kuya kule menemene. Mêmè ndi muyiishi wa nkùlunkulu ubi ujinga kumònà cyàkàbìdì matùkù à kale awu. Nkaadiku mumònemònè byàbûngì byà ditentulangana edi, Hollywood wèngèleja Èvànjeliyò, mu mùshindù wà bìngendesha bikolè ku mwoyi ne bincyòkesha. Èywà, mukalenge. Ndi muswè kumònà ngenzèlù wa cyena kale. Ndi ncììna ne nkŵepì kutwàlwà kuvwija bwena Kilistò butàmba kulengela bwà bantu; nnjila wa njiwù's.

⁶² Mpindyewu, Yéhoshàfâtà ùdi ùpweka, wèla meeji ne: "Kaa, èè, mfùmù munène wa Izàlèèlè ewu, nêngììkalè ànu... Kaa,

netwìkalè... Nebììkalè ànu bìmpè.” Ne ànu munkaci mwà dibàlakana dyônsò dinène edi, cyàkenzaye ncinyi? Wàkenza cipungidi, bwà kubànda kuntwaku kukalwisha mwena lukunà, mu didisanga, bwalu bàkamba ne: “Tudi bônsò bantu bàmwè.” Kàdi kabàvwa bàmwè to. Umwe ùvwa mmusùmbà wà mûle ne Nyumà, mukwàbò ùvwa mmusùmbà wà civùmvù. Ki mbantu bàmwè to. To, mukalenge. Kanwèna mwà kwikala ne... .

⁶³ Mìdimà kayèna mwà kwikala ne bwôbùmwè ne bukênkè to. Bu—butùkù kabwèna mwà kwikalakù mu bwikadi bwà munyà to. Nènku cikondo cyà njiwù cìdiku, mpankaci pàà bikondo. Mpàdì ànu dîbà dìbwela anyì pàdidi dìpàtuka, ki cikondo cyà njiwù cìdiku. Kakwèna lùmónu lwà kumònà bitòòke menemene to; myèndù yèbè yà màshinyì kayákuleeja bìmpè ne bitòòke to. Mbitàmbe bwìmpè kwíkale anyi mifitù anyì bukênkè. Yesù wàkamba ne: “Ikàlà ku luyà anyì ku mashikà, kwíkadi civùmvù to.” Bushuwà, ki mwaba wà njiwù ngwôwò awu.

⁶⁴ Ne pashìshe Yéhoshàfàtà, pààkapwekàye, ne pashìshe cipungidi cinène eci cyàkenjiibwa, cìvwà kaciyì cisànkishe Nzambì to. Nènku mònaayi, ànu mu cikondo mene cyà dyendè, disaluka dyônsò adi mpindyewu ne: “Ndi mulengèlèèle mfùmù ewu. Nènku, kaa, ndi—ndi—ndi ne bwobùmwè ne mwena mutumba ewu. Ndi ne...”

⁶⁵ Nwamònou's, dìmukilààyi, aci, èkèleeziyà. Nwamònou anyì? Cyôci aci ki cidi cilela ndululu yônsò yìdi minyùngùlùkile èkèleeziyà ewu, ne myaba mikwàbò. Nwamònou anyì? Dìmukààyi bwà banùdì nudisanga naabò. Nwamònou anyì? Pàtukààyi buludi, ne nwìkalè anyì bwà Kilistò anyì bálwishi Bendè. Nwamònou anyì?

⁶⁶ Mpindyewu, muntu ewu wàkenza cipungidi, ne wàkeela meeji ne ùvvà mwenzè cintu cinène. Kàdi, pààkambàye ne: “Mpindyewu kakwènakù, kumpàlè kwà twêtù kubànda, bìvwa bikèngela bwà twêtù kukonka Mukalenge pa bwalu ebu?” Mpindyewu, Yéhoshàfàtà ùvwa mushàale ne ntèndeelu bûngì bukùmbànè munda mwèndè amu, mu cilémà cyèndè, cyà mùvvwàye tuyè kuntwaku kùdì mfùmù ewu, kàdi ùvwa ne ntèndeelu bûngì bukùmbànè munda mwèndè bwà kwela meeji ne: “Èè, bìvwa bikèngelaku bwà twêtù kukonka Mukalenge.”

⁶⁷ Mpindyewu, Aakàbà ùvwa ùpàtuka buludi kàyì wàmbaku dìyì to; cikòlà ànu ngenzèlù wendè wa maalu muumìnyine, wa mubidi, wa bumùntù awu.

⁶⁸ Ndi ànu dikonka mwab'ewu, èkèleeziyà, ní kabyéna nànkú ne, misangu yàbûngì, tutu benzènze bilèma. Ùdifwanyikijilaci, wàmba ne: “Èè, cìvwa cifwànyìne kwikala mùshindù ewu,” kàdi twêtù kucitèèka mùshindù awu.

⁶⁹ Ndi ngèèla meeji ne ki mwaba ùdi ditangalaja dyônsò dyà luumù lwimpè dyà mu Àmèrikè disanganyiibwà leelù ewu, dyà ne tudi badítèèke mu mmwènekelu wa—wa, ûndi

mwà kwamba ne, ditangalaja dyà luumù lwîmpè dyà cyena Hollywood, bintu bûngì cyakaa byà dibàlakana. Tudi tumòna mutangadiki ùlwa pa cibùmbà cyà ku cyambilu, leelù ewu, nènku, ekèlekekè, mudyûje yônsô, ne wèla minèkù bûngìyì kumpàla kwà kutwàdijayè kuyiisha, ne bintu byà mùshindù awu, ne bintu byà macimbu ne byenzedi byà butâtakàne, mu cyambilu amu. Pàkaadìbi bïkafika ku dibiìkila dyà ku cyoshelu, bantu kabèèna nànsha mene bamòna meeji matòòke nànsha makesè à kwenza naawù dibiìkila dyà ku cyoshelu to. Ncjà bushùwà. Ki bwà cinyì buloba mmbubwele mu ngiikàdilù wa civùmvù leelù ewu, mùdìbü bùsànganyiibwa.

⁷⁰ Ndi ndikonka, leelù ewu's. Cidi ànu, leelù ewu, ndi... Èkèleziyà, tudi batèete bwà kutùma bânà bëètù bâà balùme mu túlaasà, bwà kulonga maalu à mu disòmба, ne byàbûngì byà mùshindù awu, bwà kumanya mwà kwenza ndongamu, bwà kubwela mu cyambilu ne kulongolola wètù... Mukenji ùdi ùtâmba kukoka, mu mùshindù wà ne neübàkule bantu, ne kubàkula ntémà yàbò. Bamanyi banène bà maalu à mu disòmба bâàbûngì bâdi bâpàtuka bu balongeshi mùshindù awu, ne bânèkesha ne bâlwàta bintu byàbûngì. Ki mêmè kudìkonka ànu, pàdìbo... bwà... Tudi ànu dîbà dyônsò munkaci mwà kwambilangana bwà bulenga ne dikòkiibwa dyà èkèleziyà. Kàdi tudi tupangila bwà kubàmbila ne: "Ewu udi muswè kuNdonda, adipidye yéyè mwinè, àmbule nkùrusè wendè, ne àNdondè." Ndi ndikonka ní katwèna bavwije bulenga bwà èkèleziyà butàmbe kulengela, bwà muntu udi ubwelamù.

⁷¹ Cileejilu, èkèleziyà wa ba Baptistes leelù ewu ùdi ne cikèmu cyà ne: "Mùliyô mukwàbò mu cidimu cyà 44," babweja bidimba ku binunu, ne makùmì à binunu, kabayì bâkùdìmuna mucima to, ànu bantu bâdi babwelamù cyanàànà ne bâshààla bâà mu èkèleziyà. Nènku ciinè aci ncipangishi kùdi Èkèleziyà wa Yesù Kilistò, bwà kubweja bidimba byà mùshindù awu. Baciikàle banwà maalà. Baciikàle ànu banwà mfwankà. Baciikàle ànu bâtwa twartà twà mfranga. Baciikàle ànu bâshima.

⁷² Bâdi bâlwà mu èkèleziyà, bindile bwà kubàyikidishabò kùdi musùmbà wà bayiishi bâà cyena Hollywood bâdi basàkùke aba, balwàta dibàlakana dyàbûngì, ne byombelu binène byàbûngì bitentakajangana pa cibùmbà cyà ku cyambilu apu.

⁷³ Pàabi, bïvwa bïkèngela kwikalabò ne dibiìkila dyà ku cyoshelu kuntwaku, dyà cyena-kale, dyà Nzambì dyàmbedi, bâpatuka bënda badila; kùdi balùme ne bakàjì kabayì bâlwà bwà kubàlakana, anyì kunyemakana mbilu ne kwenza maalu à macimbu à bikàsa nànsha, kàdi kutwà binù ku cyoshelu ne kumanya ne lufù lwà Yesù Kilistò kuntwaku, wàkafwà bwà bwalu bwàbò awu, bwà kwalukilabò ne meeji matòòke kùdi Nzambì cyàkàbidi.

⁷⁴ Ndi ndikonka ní katwèna ne mwoyi mu cikondo cyà

mùshindù awu anyi, patùdì twangata batangadiki banène, bu bààbùngì bàdì munkaci mwà kukòsolola matunga leelù ewu, bàà ku batangidiki banène bamanyike bàdì bâlonge maalu à mu disòmba ne kukoka bantu ku èkèleeziyà. Kàdi paanyimà pàà wêwè momane kubàbweja mu èkèleeziyà, dîbà adi ciwàbènzelà cinyi? Ncinyì–ncinyì cyàbènzekela paanyimà pàà bamanè kubwela mu èkèleeziyà? Anu kulamakana ne èkèleeziyà, kàdi kwalukila ne mpèkaatù umweumwe awu ne dijinga dimwèdimwè dyàkabwelàbo naadi mu èkèleeziyà adi. Bâdi bààlukila mùshindù ùmwèùmwè awu. Nènku ki bwà cinyì, leelù ewu, bàà pa buloba mbabâtàngile, bàmba ne: “Èè, bu muntu *wàwa* mwikàle ne ntèndeleelu, bu muntu *ewu* mwikàle ne ntèndeleelu...”

⁷⁵ Ndi ne bwôwa bwà ní tudi batàmbe kucivwija cipeepèle. Cìdi, ndi munangè... Ngèèla meeji ne, disànska, cyà bushùwà, ngèèla meeji ne masànkà ônsò adi àsanganyiibwa mu Yesù Kilistò. Ncyà bushùwà. Ndi ngiitabuuja ne mbyà disànska ne musàngeelu. Kàdi vùlukààku ne, mwanèètù, nnjila wa dipùnga ne lufù ne dikènga ne nkùrusè. Nudi ne cyà kumanya aci, kàbìdì. Ncyà bushùwà. Ndi ndikonka ní katwèna bacilengeje ndambù—citambe kunefuka ndambù.

⁷⁶ Byenze bu, pâmvwà ntàngila, ki mukàjàànyì kutèèka... Pankààvwa ne mpatuka, nènku yéyè kungaasa cilòngò cyà rose pa nkooci mu dìndà emu. Yéyè ne: “Bìvwa bìkèngela bwa wêwè kucivwàla. Mamwèbè’s ùdi ne mwoyi.”

Ki mêmè ne: “Kaa, munanga wanyì, ncyêna mumanyè to.”

⁷⁷ Ditùkù dyà Maamù ndilenga be, kàdi aci’s ncyenze ànu mùdì bàà pa buloba’s, mbabange kwenda naadì mushinga, ànu bwà kupàànyisha menemene bilòngò ne bintu byà mùshindù awu. Mòna’s, mbundù kùdì maamù. Mòna’s, maamù wanyì ùdi maamù wanyì ditùkù dyônsò dyà cidimu, èyowà’s, mukalenge, ki ng’ànù ditùkù dìmwèpelè nànsha.

Ndi mwà kwamba ne: “Udi munangè mamwèbè anyì?”

⁷⁸ “Mvwa mumutùmìne cikùtù cyà bilòngò mu Ditùkù dyà Maamù dyà musangu mushààle.” Èè, mwanèètù, ùdi ne cyà kwikalà maamù ditùkù dyônsò edi. Kàdi dìkaadi dyà bungèndààmùshìngà.

⁷⁹ Cilòngò aci ncilenga. Ntu munange cilòngò cilenga. Ndi ncyèleela meeji mùshindù ûntù ngènza awu... Mùshindù mwine ùdi cilòngò cilenga’s wè. Cìdi cìtooyika. Kàbìdì cìdi ne dipembu. Ne mupici wa njila ùdi uumvwà mwenyi wàcì. Nyama úpcilapù, uumvwà mwenyi wàcì. Kàdi, mpindyewu tàngilààyi, cìdi cilenga. Bu mùdi Èkèleeziyà wa Mukalenge Yesù Kilistò, Ncintu cyà citambe kwikalà cyà butùmbi; Dyondopa dyà kùdi Nzambì, ne makolè, ne maalu à kukèma, ne bimanyinu, ne bishìmà, ne budishikaminyi ku mpèkaatù. Mmwaba mulenga wà

dikèma. Kàdi, tàngilààyi, pìikalàbi ne cilòngò cyà rose aci... Nebikengelè bwà twêtù kulwa, Èkèleeziyà, bu bufuki bwônsò.

⁸⁰ Cilòngò cyà rose aci, bu mùdici cilenga, ngomba yônsò mu ditunga mmufwànyìne kucilàka bu yêyè mwà kupeta mpùngà. Kàdi bufuki mbulongolole twelè tukesè, tuumafùmà tukesè tupàtùke pambèlù apu, tûbìkidiibwa ne mmêba, ne àdi àyipata. Wôwò awu àdi àcîlama. Mmwômò menemene.

⁸¹ Nènku ndi ngèela meeji ne, leelù ewu, twêtù katùyì ne Dîyî dyà Nzambì to, ditwè kupita mwelè wà mvitâ wà nseke yibidì, mu nyüngulukilu wa bulenga bwà bukolè bwà cijila bwà Nzambì, netûlekele ngomba yônsò wa mu ditunga bwà kuCilàkaye ne kuCítùùla. NeCikooyishiibwe. Necìlkale pipangishi kùdì Èkèleeziyà. Ncyà bushùwà.

⁸² Ngèela meeji, leelù ewu, citùdi naacì dijinga mbambi bakwàbò babiikila kùdì Nzambì, bà cyena-kale menemene, bakayàbâle, pàmwâpa kabayì balonge kàlaasà kààbûngì to, kàdi bâtwishâ bantu binù ku cyoshelu, ne kwôkò aka bâpunga ne lufù. Kaciyì ne disànkà ne tuseku, ne biikale bacyànkuya bàzòkà, ne bâfunda dînà dyàbò pa dibèji to; kàdi, mwaniètù, mwadi mukolè wà nkùlunkulu ne kufwìlamù, too ne pàdì balùme ne bakàjì banyingalala banyìngalelamù ku mpèkaatù yàbò ne bàseemena pabwípi ne Nzambì. Amen.

⁸³ Ndi nnwàmbila, tudi ne byà ne: “Elààyi byanza muulu, mbanganyì bâdì baswè kwitaba Kilistò,” byônsò mùshindù awu. Abi’s mbîmpè, mwaniètù, kàdi aci kacyèna—aci kacyèna cyùmusha mpèkaatù nànsha.

⁸⁴ Bidi bïkukèngela kunyingalala dyàmbedi, kudìlongolola, kutwà binu mwaba awu kàdi kujikula mwadi mukolè. Ndi mwà kuvùluka bikondo bìvwà bantu bàà cyena-kale mwà kwendela mu tujila, bàbànda bâpweka ne njila, badila mwadi, bàyukila ne beena mutumba bààbò. Abu bàvwa beena Kilistò bàà ditùkù adi; babàmbila bwà maalu à Mukalenge.

⁸⁵ Kàdi, leelù ewu, tudi tufunda dînà dyètù mu mukàndà wà èkèleeziyà, ne tupàtuka tukashààla kumbèlù, ne katùyì tuBütèèja kâbìdì to. Katùyì tubùcyùka to. “Anu bu mutùkaadì bàà mu èkèleeziyà, mbîmpè.” Ndi mutwìshiibwe ne tudi bapiile mwaba awu, balùmyànà. TUDIKENKÉTAAYI. Bwalu, aci kacyàkutwà makàsà panshi ku cilumbulwìlu to. To, mukalenge. Kacyàkwimana to.

⁸⁶ Ki ncintu cishààdile to ku cyà ne: “Ewu ubi muswe kuNdonda, àdìpidyè yêyè mwinè, àmbulè nkùrusè wendè, ne àfwé ku ditùkù dyônsò.” Ushààla mufwè, pa nkùrusè apu. Ncyà bushùwà. Dipùnga ne lufù! “Njila, nendondè njila,” munùtù nwimba, “ne banyààbanyà badyombola bàà Mukalenge.”

⁸⁷ Ndi ngèela meeji leelù ewu ne, ncikondo kaayì citùdi ne mwoyi eci’s! Mùdì, ditangalaja dyà luumù lwîmpè, bâdi bâditeeka pambèlù mu makénkè manène maalàbâle, ne bâdi

bâeteeta . . . Panùdì numòna mutangadiki ùlwà mu cimenga, nudi nudìkonka. Mémè, ànyì masangisha àkaadi pàwù mapiile ku cintu cìmwècìmwè aci. Ncyà bushùwà. Ndi ndikonka ne nganyì udi ulwa mu cimenga, misangu mikwàbò, mmutangadiki anyì Yesù Kilistò? Mona's, bôbò bâdi ne . . .

⁸⁸ Mêmè kubwela mu mwaba kampànda kaaba aka, àbìdì adi pansi aa, mùvvà mutangadiki kampànda ne cyà kulwa. Ne Dînà dyà Yesù . . . Môna's, bàvwa ne fôtô wa mutangadiki awu ne: “muntu wa cikondo eci,” muntu udi ne *cikampànda*, muntu udi ne *cikansanga*.

⁸⁹ Mêmè, mîngà misangu ndi ngèèla meeji ku mudimu wànyì wa bwambi, ne mmòna bantu bâlwa. Nènku mvwa mufwànyìne kubwela mu cibambalu cyà cilààla-beenyi, ngàmba ne: “Nzambì, nganyì—nganyì udi bantu bâlwa bwà kumònà, mmêmè anyì ng’Wêwè?” Nwamònù anyì? “Pìikalàbo bâlwa bwà kummònà mêmè, mbajimìne, nànsha nànkù; kâdi, Éyi Nzambì, ngupùlekù pansi, ngumùshe mêmè. Ndi muswè kuleeja mpàla Webè, Wêwè Mwena kumpàla kutwimana dîngà ditùkù, ne byanza bizakalala, ne mubidi mutekète ùzakalala, bakutàngile Wêwè. Mumanyè ne musùùkà wànyì mmulembeleja ku dipàngadika Dyèbè.” Tùzanjikààyi Kilistò.

⁹⁰ Leelù ewu, wêwè udi wamba ne: “Èè, mêmè’s ndi wa mu ba-Baptistes. Mêmè ndi Méthodiste. Ndi wa mu tabernacle. Ntu ngenza *cikampànda*.” Kaa, aci kacyèna naaci bwalu to; kî ncintu to. Ndi ndikonka misangu mikwàbò.

⁹¹ Munu emu matùkù mashàale aa, mêmè e kumònà di-dimanyisha kuulu, mwaba ùvwa cibìlù kampànda ne cyà kwenzekela mu cimenga. Ne dîyì dyà muntu, dînà dyà muntu difùnda mu màleetà manène ku nyungulukilu, mùshindù awu. Nènku lwà kwinshì aku, mu kaaditumba kakesè, bàmba ne: “Yesù Kilistò umweumwe awu makèèlèlè, leelù, too ne kashidi,” lwà kwinshì mu ditumba. Nwamònù anyì?

⁹² Mbuumùshe cijila cyônsò mu Kilistò, ne bacitàèke pa muntu kampànda, anyì èkèleeziyà kampànda, anyì bulongolodi kampànda. Mwanèètù, ndi nkwickila ne, udi mwà kwitabiibwa mu dibàlakana, ne lukutukutu lwà Hollywood, mùshindù awu, mu . . . kûdi èkèleeziyà. Kâdi, mu Bwikadi bwà Yesù Kilistò, Yéyè ki Umwèpelè wa kutumbisha. Ncyà bushùwà. Mpindyewu, aci's mbulelèlè, mwanèètù wa balùme munanga ne mwanèètù wa bakaji.

⁹³ Kanùmfikidi munda to. Nwêñù vùlukààyi ànu ne mêmè ndi munkaci mwà kunuyiisha. Ndi muswè kuyiisha byenzé ànu bu ne edi dìvwa diyiisha dyànyì dyà ndekeelu dîmvwà ne cyà kuyiisha mu matùkù ànyì à mwoyi. Ndi muswè kuyiisha, diyiisha dyônsò dîndì nyiisha, bu ne mvwa muntu wa ùpùnga ne lufù ùyiisha bantu bâdi bâpùnga ne lufù. Ne, ke cîndi; bukénkè bwànyì bûdi bwènda bùbwita, ditùkù dyônsò; ne bwèbè, pààbò. Nènku tudi

bantu bàà cifwàkà bàdì bàpùnga ne lufù. Ne butùdì naabò mbwà kukùngàmangana ne Nzambì udi ne mwoyi, dìmwè dyà ku matùkù àdì pansi aa, kàdi bìdi bìkèngela tutambè kwikala menemene ne meeji matòòke bwà bwalu ebu.

⁹⁴ Ànu mu dibàlakana, ne kwenza maalu à lukutukutu, kushààla wa mu èkèleeyiyà, ne kuya *eku* ne *kwàka*, kwenza maalu mùshindù *ewu* ne mùshindù *wàwa*.

⁹⁵ Bivwa bitàmbe bwîmpè twétù kwenza masangisha à cyenakale mu nzùbu yètù, twela mbilà kùdì Nzambì, munyà ne butùkù. Ditùkù dikaadi pabwîpì ne: “cikondo cyà dikènga, cikondo cyà lutàtù.” Bible mmwambè ne: “ditùkù dyà mîdimà.” Ne twêtù tudi ne mwoyi munda mwàdì.

⁹⁶ Mùshindù mwinè wàkapweka muntu munène awu kuntwaku mu disaluka. E kukalamakanayè ne bantu bàà civùmvù, ne bàà ku mikàlu, kàdi kwela meeji ne ùvwa wènza cintu kampànda cinène, wèla meeji ne Nzambì ùvwa munkaci mwà kumubènèsha. Kàdi kàyì mumanyè ne ànu pa dîbà adi mene ùvwa munkaci mwà kubweja musùmbà wèndè wônsò pàmwè nendè to. Ncinyì aci? “Kasùmbù kètù kakesè, kà-kà Yudà kuntu *eku*, nkafwànyìne kulwa ne kulamakana nètù pàmwè ne misùmbà minène yà Izàlèèlè. Netwikalè cisàmbà cyà bukolè be.”

⁹⁷ Ki bwalu abu's. Nènku aci's ke njila wa mashimi udi dyabùlù ûlonda ànu mpindyewu ewu, bwà kubweja mufwìlakanyi ne Kilistò; ne ditwishiibwa dyônsò ànu bu mûndì mwimàne mwab'ewu emu. “Netùsangishe makàndà ètù wônsò pàmwè.” Katwèna mwà kucyènza to. Mmunyi mùdì bantu bàbìdì mwà kwendela pàmwè, bôbò kabàyì bumvwàngànè?

⁹⁸ États-Unis ewu wènza dilabula dìmwèdìmwè, ànu dyôdì dìmwèdìmwè adi, ne cilèma cìmwècìmwè aci, pààkadìsangayè ne Russie kale *wàwa*. Mu cikondo mene cìvwàbo bàmba kukùtula mvitâ, kàdi twétù kudìswìka pàmwè ne Russie. Nènku mpindyewu's nwamònou citùdì bapeta's, kí mmwômò anyì? Bôbò bàdi ne ndekè yètù ne mìnsonkòtù yètù yônsò, ne bômbà yètù yà mushindà ne bintu byônsò biteèka kuntu *kwàka*, bwà kutulonzabì. Cintu cìmwècìmwè aci cidi cyènzechaka mu nyumà.

⁹⁹ Pashiìshe tudi tusangana ne, paanyimà pàà Yéhoshàfâtà mananè kwenza cipungidi eci, ne bôbò bàkakonka. Mpindyewu tàngilààyi, tàngilààyi bàà pa buloba, yêyè ne: “Bushùwà, tudi ne baprofetà bûngì cyanàànà kaaba aka. Tudi naabo sémìnérè mûle tèntè.”

¹⁰⁰ Kuyabò kangata balùmyànà bàvvà balongèshiìbwé, bàvvwa bamanyè maalu à mu disòmba, bàvvà bamanyè byônsò pa bwalu abu. Yéyè ne: “Lwâyi mpindyewu, ne tudi tulòmba bwà kukonka Mukalenge.”

¹⁰¹ Bônsò bwàbò, mu bushùwà bwà bwalu, mu meeji àbò à musunya à didìleeja, kulwabò mwaba awu bàmba ne:

"Mpindyewu, tàngilààyi, twêtù... Wêwè tungùnuka bânda. Mukalenge ùdi neebè, ne Mukalenge neànùpèèshè kapese kàà buloba aku, nànnku, nebwìkalè bwènù. Nenwìpate beena Suliyà abu mu njila yônsò amu. Nenùbiipatè." Umwe wa kùdìbo mene ùvwa mudyenzèle nsèngù yìbìdì minène yà cyamù cifiìke, e kutwàdjayè kunyùnguluka mùshindù *ewu*, wàmba ne: "Eci nùnku, ke cinwìpatà naacì beena Suliyà."

¹⁰² Kàdi, Yèhoshàfàtà, uwakù mutambe kwikale wa nyumà, kàyì mwà kutwala bintu byà budingidingi byà bikàsa abi to. Ncyà bushùwà.

¹⁰³ Nzambì, tùpèèshetu baa Yèhoshàfàtà bakwàbò, bàdi buumvwe bibì ne bacyòke ne bikàsà byà cyena Hollywood ebi. Ncyà bushùwà, bàdïcinkila, bàdingidja kwikalà cintu kampànda cìdibo kabayì nànscha; bàdileeja, banèkesha, bàpulumunangana. Kàdi pashìshe dîbà didìbo bàbwelamù, cinùdì nupeta ncinyì panùdì nubwelamù? Mbyenze bu kulomba muntu ne: "Lwâku ôwelè mu cipèèlà". Ki ncintu cikwàbò to ànu mushikì wà lusenga mukwikile mu mutù wèbè amu, wà ùksusaamisha pashìshe.

¹⁰⁴ Mpindyewu mònaayi ne, cyûdì mwà kubabwejelamù ncinyì? Inábànzà kampànda kungambilayè ditùkù adi ne: "Muntu kampànda kwambayè ne: 'Ndi mufwànyìne kuya mu èkèleeziyà, kàdi ncinyì-ncinyì cíndi mufwànyine kupeta pângàaya mu èkèleeziyà'" Yéyè ne: "Byônsò bidìbo bènza nkulongolola kwà didyà kampànda dyà dilòòlò, ne bàdi... bwà *cikampànda, cikansanga, ne cikankènga*." Ki inábànzà awu kwambayè ne: "Mémè kushààla ncifyi ne cyà kwamba, bwalu ncìvwa mumaye kwà kumutùma to." Ki bwalu abu's. Yéyè kwamba ne: "Mvwa njinga ne ngààpetakù èkèleeziyà wa kale mùdìbo menemene bimba misambu yà cyena-kale ne bënda lwendu lwà difwànà dyà Nzambì."

¹⁰⁵ Bânà bàdì ne nzala, bàdi mwà kadyà mu cipànzà cyà bukooyà. Mbitàngile Èkèleeziyà wa Nzambì udi ne mwoyi bwà kubàdìisha Dîyì dilelèlè dyà mwoyi dyà... dyà Nzambì.

¹⁰⁶ Mwômò amu, mu dibàlakana dyônsò adi ne bikwàbò, Yèhoshàfàtà kwambayè ne: "Kakwénakù kabidì mukwàbò anyì?"

¹⁰⁷ "Kakwénakù mukwàbò anyì?" mwàkambà Aakàbà. "Èè, cyûdì ujingila mukwàbò kàbìdì ncinyì? S'tudi naabò nkàmà yìnaayi bàà batàmbe bwímpè bàà kacya, bàsòbola, balongesha, badìishiiibwe bímpè, bantu balwàdika bímpè bàdìku mu ditùnga, biimàne mwaba ewu. Yônsò wa kùdìbo ne dîyì dimwè, ne mwoyi wùmwè, ne dîyì dimwè, bàmba ne: 'Ndaaku! Nzambì ùdi neebe.'"

¹⁰⁸ Ndi ndikonka ne Étas-Unis ewu kî mmutfwìlàngane ne cintu cìmwècìmwè aci anyì. Ndi ndikonka ne Èkèleeziyà wa Nzambì ní kî mmutfwìlàngane ne cintu cìmwècìmwè eci anyì.

Ndi ndikonka. “Èè,” mûdî wàmba, “tàngilà, s’bâdi munkaci mwà kutanta. Bâdi bènza masangisha manène, maalàbâle. Bâdi bâkoka binunu musangu ùmwèpelè.” Kâdi ndi ndikonka ní kakwènakù ànu umwèpelè mutantàme. Ndi ndikonka ní kakwènakù cintu kampànda cishìlàngànè.

¹⁰⁹ Tudi tusangana ne, tudi bapetè bantu binunu makumi àsàtù bakùdîmune mucîma mu mbingu yìsambòmbò, kâdi paanyimà pàà mbingu yìsambòmbò katuciyi nànscha ne ùmwèpelè to. Kûdi cintu kampànda cipampàlâmukè mwaba kampànda. Ncyà bushùwà. Nènku cyôcì cyônsò cidi ànu dibàlakana, didileeja. Maalu à pa buloba, kupìcila ku télèviziyyô, kupìcila ku tudyòmbà, kupìcila ku dileeja dyà bindidimbì, ne mitùbù yìdì kuntwaku ayi, mbinyânge ditunga edi ne bintu byà budingdingi byà cyena Hollywood abi. Ncyà bushùwà. Cintu ne cintu cyônsò nciswè kwikala mu dibàlakana dinène adi. Kî m’bulelèlè anyì? Nudi bamanyè ne aci’s m’bulelèlè. Twêtù katwèna kâbìdì ne ntèndeleelu wa cyena-kale utùvwakù nendè kùkaadi bidimu awu to. Mbwalu úkaadi mulekelela. Netùfikèku, ànu mu katancì kakesè emu, nenùmonè.

¹¹⁰ Mònà’s, ncimfwànyì kaayì bulenga’s wè, anyì cimfwànyi cidi cibindulula’s, mûndî mufwànyine kwamba. Nènku ki Yéhoshàfâtà ulwàlwà ewu, wàmba ne: “Èyowà, ndi mubàmònà bônsò. Bâdi, muntu ne muntu, mbapete mapolome àbò,” ne cyônsò ciwàkù aci. “Bônsò bwàbò mbapròfetà, anyì bambi banène. Mbapàtùkile mu bilongelu binène. Ne bâdi bônsò mùshindù ewu. Mbapàtùkile mu cilongelu cinène cyà bapròfetà, ne bikwàbò byônsò. Bônsò bâdi ne diyì dìmwè. Ncyà bushùwà. Kâdi kakwènakù mukwàbò nànscha ùmwèpelè anyì?”

¹¹¹ “Èè, cyûdì ujingila mukwàbò kâbìdì ncinyì, pàdì nkàmà yìnaayì yìtabangana lupungu lùmwè?”

¹¹² Kâdi muntu awu, mu mwoyi wèndè amu, ùvvwa ne Nzambì. Ne ùvvwa mumanyè ne kùvvwa cintu kampàndà cyà cibì mu bwalu abu. Èyowà’s, mukalenge. Ùvvwa mumanyè ne kuvwa cintu kampànda cibolè. Bwà cinyì? Swâyì mnupèeshè . . . Mifündu kayèna yìcítèèja to, kâdi mònayi cîndì mupete. Ndi mumanyè ne—ne Yéhoshàfâtà ùvvwa mumanyè ne mwena lubombo uvwa kuntwaku awu, Aakàbà, bwà ne kàvvwa mu dyumvwangana ne Nzambì nànscha. Ne Eliyà ùvvwa mwambe cipròfetà ne Dîyì dyà Nzambì kùdiye. Ne mmunyì mùvvwa Nzambì mwà kubènesha ciwwà Ye mwêle mulawu? Amen.

¹¹³ Ndi ngàmba cintu cimwècimwè aci leelù ewu, mulundà wanyì. Ne Ekeleeziyà wa Nzambì udi ne mwoyi, udi mwimâne ne lulamatu kùdi Nzambì awu, neâmbè cintu cimwècimwè aci. Kwénà mwà kusambakaja màfutà ne mâyì pàmwè kâdi kucibìkila ne ndupàndu to. Kwénà mwà kwenza nànkú to. Bikèngela wêwè nkààyèbè kutàpuluka, mwanètù. Cintu kampànda cidi ne cyà kwenzeka. Piikalàku kushàâle ditèkemena

kampànda, tudi ne cyà kwenza cintu kampànda, ne kucyènza lùkàsàlùkàsà; bwalu, cikondo cyà Dyambwibwa cìdi pabwípi.

¹¹⁴ Bintu bìdì munkaci mwà kutentamangana, bintu byônsò, ne èkèleeyiyà ùdi kule menemene. Bàdi bàbala bikàndàkàndà, ne mikàndà, ne maalu-malonda byà mìshindù yônsò ne bintu byônsò. Ndi mufwànyine kuya leelù ewu ku... Ndi mwà kuya mu èkèleeyiyà kampànda, ne ndi mwà kwamba ne: "Kaa, mbanganyì bàdì bamanyè..." Mbamanye musambu wônsò, paanyimà pàà dimwè dyà ku matàbuluja manène aa. "Mpindyewu, ndibèji kaayi—kaayi mùdì musambu kampànda ûsanganyiibwa?" Mbàdimanyè. Mbamanye ne nganyì mwinè awu. Mbamanye ne nganyì udi mufile mpàla bwà kushààlaye Mfùmù wa ditunga, ne nganyì udi mufile mpàla bwà *cikampànda*, ne mbúngì kaayi bwà balùmyànà bàdì bendè luumù bàà mu sèndèma bàdi basélèngane, *cikampànda* ne *cikansanga*, ne *cikankènga*. Kàdi, bwà Díyì dyà Nzambì, bôbò kî mbamanye kantu nànsha kàmwè to. Kàdi's ki bwalu abu. Pa nànku tudi tufila dyàbò dibàlak-... Kàdi, nànsha nànku, bàdi bàmba mùdìbò beena Kilistò.

¹¹⁵ Kî ncisàmbà cìdi ne cyà kudyûdiibwa to. Bìdi byùmukila paanyimà pàà cibùmbà cyà ku cyambilu, ki kùdici cyùmukila. Menemene. Ncyùmukila paanyimà pàà cibùmbà cyà ku cyambilu. Bàdi bàbàlongesha byonà byà mìshindù yônsò, ne *bikampànda* ne *bikansanga* byà mìshindù yônsò, ne malongolodi, ne mùshindù wà kwenza tusumbù twà bansòngà, ne byônsò byà mùshindù awu abi. Ndi ndikonka ní mbipàtula bipeta. Ncyêna naabi bwalu to, kàdi ndi ndikonka aci ní ke cìdi Nzambì ûlòmbà.

¹¹⁶ Pààbì, Yesù wàkamba ne: "Muntu yéyè kàyì mulediibwe kùdi mâyì ne Nyumà to, yéyè kààkubwelakù mu Bukalenge nànsha bishi to. Ewu yônsò wâswà ku-... wâswà kuNdonda, àdipidyè yéyè mwinè, ne bisànkasanka byèndè byà pa buloba, àmbule nkùrusè wendè, ne àNdôndè." *Nkùrusè* ùdi cimfwànyì cyà "lufù, ne dipùnga ne lufù." "Ewu yônsò wâswa kwikala mwena Kilistò, àtapuluke yéyè mwine ne meeji èndè sungasunga. Àtàpuluke ne byenzedi byèndè sungasunga. Àtàpulukè yéyè mwinè ne bintu byônsò, àdipidyè, ne àmbule nkùrusè mujidila awu, ne àNdondè ku ditùkù ne ku ditùkù. Ewu yônsò wâswà kuNdonda awu, enzè nànku awu." Aci's ke cyàkambà Yesù.

¹¹⁷ Kàdi, leelù ewu, tudi twamba ne: "Muntu yônsò ikale ne cikondo cyà dicyònkomoka. Muntu yônsò atuutè bikàshi. Muntu yônsò élè lubilà ne: 'Àlèluuyàh!' Muntu yônsò énzè *cikampànda*." Kaa, mùshindù mwinè utùdi ne musùmbà wa makòkyanganyi's wè! Amen. Nzambì... Tudi tusàka misambu mipyamipyà ne tuyimba lùbilulùbilu, byenze bu ne tudi tunyemena naayì lubilu tupàtukila mu cimanu, anyì cintu kampànda cyà mùshindù awu.

¹¹⁸ Pândì, mêmè ngèèla meeji ne, bu twêtu mwà kwimba ne *Pépì*, *Neebè*, *Nzambì Wanyì*, bivwa bifwànyine kwikala bitambe bwîmpè bikole bwà Èkèleeyiyà; misambu yà cyena-kale.

¹¹⁹ Tidisangana ne cisùmbù cyà bajì bâà majà, nsongààlùme kampànda ùdi mu cisùmbù cyà bajì bâà majà apa, dilòòlò dishààle, ne dilòòlò edi nyéyè ewu apa wìmba mu èkèleeziyà wa Nzambì udi ne mwoyi amba's? Aci's ncinyangu ku mêsù kwà Nzambì. Muntu awu anji àjaadikibwè, dyàmbedi, ne àkwamè mamuma, àdi àkumbanyina kanyinganyinga, bwà kuleeja ne ùdi mu dyumvwangana ne Nzambì.

¹²⁰ Bâdi bâtwàla maalu àà jazz ku cibùmbà cyà ku cyambilu. Bâdi bâtwàla nyiishilù wa cyena Hollywood, udi ubálakana, too ne ku cibùmbà cyà ku cyambilu.

¹²¹ Môna's, ncìvwakù nsanganyiibwa mu cimenga cyènù cilengele emu, kùkaadi ndambù wa mbingu, mu Louisville, mu Kentucky anyi? Mwoyi wànyì kucìbuluka, pàvvàbò bônsò basòmbe mwaba awu, bajinga kumònà bishimà byà Nzambì; kàdi paûdì ànu ne wayiishi Èvànjeeliyò, mbafwànyìne kuula tengetenge, mu katancì aka anyi, bâkùdìmuka ne bàpàtuka mu nzùbu. Ncyà bushùwà menemene. Kabèèna naaCì bwalu to. Myoyi yàbò mmipapisha. Bàpàtuka; ne bâàbûngì bâà kùdibo, beena Mishòonyì, kàbìdì, bâtù bâya ku maèkèleeziyà à Mishòonyì abu. Kàdi bâvwa bûjìibwe...batàmbè kûjìibwa ne dibàlakana ne bikwàbò byônsò byà mùshindù awu abi, byà budingidingi ne bwena èkèleeziyà abi, kabàyì bamanyè kantu nàンsha kàmwè pa bwalu bwà Nyumà wa Nzambì udi ne mwoyi to. "Biikàle ne mmwènekelu wa difwànà dyà Nzambì, kàdi bâvila Bukolè bwâdì."

Nditùkù kaayì ditùdì ne mwoyi edi. Tàngilààyì mwaba ùdìbi byungwilè.

¹²² Yéhoshàfàtà kwambayè ne: "Ndi mumanyè, Aakàbà. Aba mbayiishi bëèbè nkàmà yìnaayi. Mbalùmyànà bâà bàmwèka bônsò bîmpè, yônsò wa kùdibo mulwâte ne nsukì yàbò misaamuna bîmpè menemene, ne bikwàbò byônsò, cikwàbò kàbìdì cìdibo mwà kwikala aci. Bâvwa mwà kwikala ne dipolomà dyàbò dyà D.D. Bâvwa mwà kwikala ne mapòlomà àbò à mishindù yônsò. Bâdi mwà kwikala bamanyè Mifundu, kuumukila ku A too ne ku Z. Kàdi kanwènakù ne mukwàbò kàbìdì, mwaba kampànda anyì? Kàkwènakù ànu mukwàbò umwepelè, mwaba kampànda anyì?"

¹²³ Yéyè ne: "Èyowà, kùdi mukwàbò, kadì mêmè ntu mumukine." Ki bwalu mbwòbù abu's. Ki bwalu mbwòbù abu's. "Mêmè ntu mumukìne." Vùlukààyì ne, Aakàbà ùvwa muntu mutèndeleeti, ne aba bâvwa balongeshi batèndeleeti, kàdi bâàkakìna muntu ewu uvwa ne Bulelèlà awu. Kwambayè ne: "Ntu mumukine." Wàmба ne: "Yéyè ùtu misangu yônsò wàmба ànu maalu àndwisha." Mmunyì mùvvwàye mwà kudìkanda bwà kucyènza, pàvvà Dîyî dyà Nzambì dimupìishe?

¹²⁴ Mmunyì muwàshààla mupùwe pawikalà mulùme wa Nzambì, anyì mukàjì wa Nzambì, kàbìdì mumanyè ne mumònè

mpèkaatù ne bikwàbò, byungwile mushikì ne myedìibwè ku cipimu, ne bantu byônsò mùshindù awu; ne mumòne mùyaayà misùukà yà bantu mu ifernò; miliyô ku ditùkù; kàdi kushààla munpùwe anyi? Kwèna mwà kwenza nànkù to.

Muntu kampànda wàkangambila ditùkù adi, wàmba ne: “Udi wela meeji ne udi mwà kuciìmanyika anyì?”

¹²⁵ Mêmè ne: “To. Ncyéna mwà kuciìmanyika to, bwalu Nzambi ngudi mwâmbè. Kàdi dìngà ditùkù, ku Cibàsà cyà Cilumbulwidi, nebàkoke cimwènyi cinène, kuteemeshila tulònđò dyàmwàmwa, ne mukàbà wà mèyì awu newèdìibwè. Nènku nengìimanè bwà kuwùtèèleja; ndi muswè kuumvwà mùdì dìyì dyànyì didimwisha bantu bwà cyôcì. Nzambi neàndumbùlwishè dìbà diìkalà dìyì dyànyì dikaaadi dicìlwisha.” Èyowà, mukalenge. Pàtùdì tutàngila mwoyi ewu, lukòngò elu, lwenzuluka cyàkàbidi ku cilumbulwidi kwâkà. Ncyà bushùwà. Tudi ne mwoyi mu cikondo cyà cìkwàcisha bwòwà. Ne ki cyôcì aci.

Nènku tudi tumumònà wènza...wàkamba ne: “Kùdikù mukwàbò kàbìdì anyì?”

¹²⁶ Yéyè ne: “Èyowà, kàdi mêmè ntu mumukìne, bwalu yêyè ùtu misangu yônsò ànu wàmba bipròfetà bibì bwànyì mêmè.”

¹²⁷ Mmunyì mùdiye mwà kudìkànda bwà kuyiisha bantu byûme neyonyocyocy abî, pàdiye ùbìmònà byènzekà ànu kwenzekà? Kumònà Aakàbà ne nsombèlu ùvvàye ùsòmba ne wènza maalu mùvvaye wènza awu, ne kufikisha bantu mu mùshindù ùdibo awu.

¹²⁸ Mmunyì mùdì mulùme wa Nzambì, anyi mukàjì wa Nzambì, mwà kudìkànda bwà kubingila ne kutàndisha mpèkaatù yà ku nseke yônsò? Mpàdìbi ne, mbamònà bayiishi bàà civùmvù, ne bàbàlakaji, ne balongeshi, ne bikwàbò mùshindù awu, bàlekela bantu bàya mu ifernò, ku miliyô, mu mashimi; bààbûngì... nànscha mu bantu bàà cijila. Ncyénà ngààkula nangànangà bwà ba-Méthodistes ne ba-Baptistes, ne bantu byà mùshindù awu; bàdi maalu awu, bôbò pààbò. Kàdi cìdì ànu mmunda mwà milongo yènù emu.

¹²⁹ Ekèlekèle, bàlwa ku cibùmbà cyà ku cyambilu, ne mmwenekelu wa bikwàbò byônsò kàdi kàyi wa beena Kilistò to, bènza maalu bu bikwàbò byônsò ebi, mu matùngà ne bikwàbò, dìbà adi bàdi bàcibììkila ne “ntèndeleelu.” Ntèndèleelu kampànda, kàdi cìdì ntàntà mule be ne lupàndu lwà Mukalenge. Ncyà bushùwà. Bàdi ànu bafikisha bantu ku musùmbà munène wà bantu basaluja. Pashiishe pàdi disaluja adi dipita, dìbà adi, katanci aka anyi, kwénakù mwà kusangana umwe wàbò nànscha; èkèleeziyà mmushààle munda mutupù. Mwanèètù, muntu yêyè munangè Nzambì, newùjè nkwasà wendè mu èkèleeziyà, musangu wônsò. Kêna mwà kushààla kule ne èkèleeziyà to. Ncyà bushùwà.

¹³⁰ Mpindyewu mònaayi, ànu tusunsa tukesè cyanàànà. Nentetè bwà kwambuluja, nye buludi ku cyena bwalu mpindyewu, bwalu dîbà dyànyì dìdì dyènda diya.

Mònaayi, pashiìshe kwambayè ne: “Kakwènakù mukwàbò nànscha umwe anyì?”

¹³¹ E kwambayè ne: “Èyowà, kàdi ntu mumukìne. Ùtu ùngambilà mèyi à cipròfetà ànu mabì. Ùtu ùngamba ànu bintu bìbì.”

“Èyowà,” kwambayè ne: “ndààyi nùkàmulondè.”

Kwambayè ne: “Dînà dyèndè m’Miikà.”

¹³² Kàdi muntu ewu ùvwa ne ntèndeeluu bûngì bukùmbàne bwà kumanya ne bantu aba kabàvwa babìngè to.

¹³³ Ne muntu kanà yônsò ukààdikù mulengìbwè awu, nànscha kakesè, kùdì Nyumà wa Nzambì, mmumanyè ne bintu ebi, bìdì bìbìkidiibwa ne mbwena Kilistò leelù ewu ebi, kî mbyà cyà bushùwà to. “Kwêna mwà kunanga maalu à pa buloba, anyì bintu byà pa buloba to. Wêwè mwenzè nànsku, dinanga dyà Nzambì kadyèna munda mwèbè to.” Bible ngudi mwâmbè nànsku.

Mpindyewu tàngilààyi. Wàkamba ne: “Ndààyi nùkamwangàte.” Ki kuyabò kuntwaku.

¹³⁴ Ki pashiìshe kutùmaye mùsànjeelà mukesè wa kale kuntwaku, mulami wa èkèleeziyà, pàmwàpa, anyì muntu kampànda, kuyayè kuntwaku e kwamba ne: “Mpindyewu tàngilà, Miikà, netùkakufikishe mwab’ewu kumpàla kwà Aakàbà ne Yéhoshàfàtà. Mpindyewu, bùbìdì bwàbò mbasòmbe pambèlù pààpa, ne mbantu banène mpindyewu. Mbalongeshi ne mbamanyi bàà mabàla. Ne bààkapeta dipolome dyàbò, ne bikwàbò. Ne yônsò wa ku séménéré wétù, yônsò wa ku èkèleeziyà yètù mwaba ewu, yìdi mu dipetangana ne eci ndiswa dyà Nzambì. Mpindyewu, wêwè ambà cintu cyà momùmwè cìdibo bâmbè aci, nènku, nyéwù nkwbambila, neùlwatè bilàmbà bîmpè ne newéndelè mu kàshinyì kàà Cadillac. Ndi nkwbambila ne, newikalè ànu muntu munène bu wêwè mwà kwenza nànsku. Èyowà’s, mukalenge. Neùtantè.”

¹³⁵ Miika kwambaye ne: “Ànu mùdì Mukalenge Nzambì ne mwoyi amu, nêngàmbè ànu cìdì Nzambì wàmба.” Amen. Èyowà. Kaa, awu’s ke muntu wa pa mwoyi wànyì. “Ndi mwà kwenzejiibwa bwà kudyà dyâmpà ne kunwà mâyì,” mùvvwaye mucyenzè amu, “bwà dyenza dya bwalu ebu.” Ùdi mwà kutuciibwa dipì ku ditàma dìmwè ne ku dikwàbò, ne bikwàbò kàbìdì, kàdi wàkamba Bulelèlè ne kushààla naabò. Nzambì wàkashindika ne m’Bulelèlè. Kàvwa mwanyishiibwe bikolè to, kàdi ùvwa mumanyè Nzambì.

¹³⁶ Kutwàlabò Miikà mukesè mununu awu mwaba awu. E kwambayè ne: “Bîmpè, Miikà, udi wamba bishi bwà bwali ebu?”

¹³⁷ Yéyè ne: “Bànda. Bànda.” Yéyè ne: “Bànda, mu ditalala. Tùngunuka, lubùlukà, ki cîndì muswè bwà wéwè kwenza ncyôci aci. Kàdi ndi mumòna Izàlèèlà bu mìkòòkò, kayiyì mulami wa mìkòòkò to, pa kakùnà kampànda, mitangàlaké. Ki cyôcì aci,” mwàkambayè.

¹³⁸ Nènku mmwenzè ànu wènza mùshindù awu; ki Aakàbà kukùdimuka e kutàngila kùdì Yéhoshàfâtà, kwambaye ne: “Mvwa mukwambila cinyì? Munsantu mubùnguluki wa mu malaba awu...” anyì, cinyì, mfwilaayiku luse, anyì, cyônsò civwàku aci; mulùmyànà awu kwambayè ne: “Aci’s... Cingàkwambidì ncinyì? Mulùmyànà awu ùtu ùngambila cipròfètà ànu cyà cibi—cyà cibi bwànyì mêmè. Cîmvwa mukwambila ncinyì? ‘Cyèndè civwa mwa kwikala ànu kupiìsha èkèleeziyà wetù, ne kupiìsha bambi bëètù, ne kupiìsha wètù mùshindù wà ntèndeleelu.’ Mvwa mukwambila ncinyi? Ùvwa ànu ne cyà kucyàmba. Ndi mumumanyè. Mvwa mumanyè papa wendè kumpàla kwendè.” Amen. “Mvwa mumanyè papa wendè kumpàla kwendè.” Uh-huh, èyowà’s, mukalenge, muntu mulelèlà wa Nzambì. Yéyè ne: “Mvwa mumanyè ne ùvwa mwà kwamba nànku.”

¹³⁹ Ki pashìishe kwambayè ne: “Èyowà,” yéyè ne: “Mêmè kumòna Izàlèèlà bu mìkòòkò, mitangàlaké, kayiyì ne mulami wa mìkòòkò to, pa kakùnà kampànda.” Ki pashìishe kwambayè ne: “Ndi mu...”

¹⁴⁰ Ke pashìishe umwe wa ku balùmyànà abu uvwa ne nsèngù minène awu, uvwa ne cyà kusàka naayi awu, muyiishi, kupàtukayè e kupulumunayè Miikà mukesè ewu ku luseke, kàdi kumutàpa dipì mu mbàngà ne bukolè bwèndè bwônsò, wàmба ne: “Njila kaayì uvwa Nyumà wa Nzambì Muyiilè bwà kupàtuka mu mêmè? Ne udi mumanyè.”

¹⁴¹ Kwambaye, yéyè ne: “Indìlà too ne pawìkale musòmba mu bùlokò emu, kàdi wêwè kushìisha kumanya njila udi Yé muylè.” Ncyà bushùwà.

¹⁴² Indila too ne pààsòmba Russie muneemu, kukwàta matùnga ne bikwàbo mùshindù awu, ne ditùnga edi, ànu bwà ditwà dyàdì dyà cimpingà, nènku nenùmonè civwà cîmpè ne civwà cibi. Ncyà bushùwà. Neùmonè ntèndeleelu webè wa civùmvù awu ní wàkufuta, anyì kààkukufuta.

¹⁴³ Ditùnga edi dìdile mwadi, kî nkuseka anyì kwela bilèlè to. Ditùngà edi diye ku binù, mu kanyinganyinga. Ki cidi cîtùkèngelà ncyôcì aci. Kî nditàbuluja dyà kubweja bantu bààbùngì mu èkèleeziyà nànsha. Bìdi bitùkengela kukàngà cinwinyì cyà maalà cyônsò, kwimanyika dinwà dyônsò dyà mfwankà, kuupula matanda. Kutwàdija cibilù cyà Nyumà

Mwîmpè, cilelèlè, cyà cyena-kale; mwìkalà balùme ne bakàjì, munyà ne butùkù, batwè mpàla yàbò pansi, munkaci mwà kudila mwadi. Ndi nnwàmbila ne, necìikalè cisokomenu mu mvità cyà citàmba bunène cìkààdiku ditunga edi dipete kacya. Mbulelèlè.

¹⁴⁴ Branham Tabernacle àlekelè budingidingi bwèndè abu. Àlukilè apa ku cyoshelu ne àdìlongòlòlè ne Nzambì. Kwakajangana ne beena mutumba, ne bikwàbò mùshindù awu, ne kudilongolola ne Nzambì. Kanwàkwikala kàbìdì ne matàndu ne makòkyanganyi; necìikalè mwaba wa buloba bujimà bukuupukila mbimbimbì. Neyà bushuwà. Mpindyewu, aci mbulelèlè.

¹⁴⁵ Ki pashìishe kwambayè ne: “Nnjila kaayì udi Nyumà wa Nzambì mupàtùkile munda mwànyì?”

¹⁴⁶ Ki Miikà kwambayè ne: “Ndi mumònè Nzambì, ne cilwilu Cyendè, nsangilu Wendè, musòmbe mu Butùmbi.”

¹⁴⁷ Nudi bamanyè’s, Nzambì ùtu wènza cisangilu Muulu mwàmwa, ku musangu ne ku musangu. Ùdi—Ùdi ùbikidisha Bèndè—Banjèlo Bèndè ne wènza ci—cisangilu, ku musangu ne ku musangu, mu Dyulu mwàmwa.

¹⁴⁸ Ki yêyè ne: “Ndi muMumònè musòmbe pa Nkwasa wa butùmbi, ne bantu bônsò bàvwa biimàne ku dyàbalùme ne ku dyà bakàjì Dyèndè.” Ki yêyè ne: “Bàvwa bàyikilangana ne: ‘Nganyì ùtùdi mwà kutùma àpwekè àkaseeswîshè Aakàbà, bwà àpàtuke àye kuntu kwàka bwà kukùmbaja cipròfetà cyà Eliyà? Nzambì mmùmanè kwamba nànku, cìvwà mwà kwenzeka ncinyì, pa nànku netùmone ne nganyì udi mwà kupweka.’

¹⁴⁹ “Kàdi ke nyumà wa mashimi kubàndayè ùmukila mwinshi,” mu bushuwà bwà bwalu, ùpàtukila mu ifernò, “kubàndayè kumpàla kwà Nzambì wàmба ne: ‘Nempwekè, ne nembwelè mu bayiishi abo ne kubenzeja bwà kwambabò cipròfetà cyà mashimi.’” Kaa, mùshindù mwine ùvwà aci cibàfiìkisha munda’s. mùshindù mwine ùvvàci cibuumvvìje bibì’s, cyà ne: “Bààkamba ne: ‘Nenye kuntwaku ne nkenzèjè bayiishi abu, yônsò wa kùdibo, bwà kwambabò cipròfetà cyà mashimi.’” E kupwekayè e kubwela mu bayiishi abo, e kutwàdijabo kwamba cipròfetà cyà mashimi.

¹⁵⁰ Nènku, mwanètù, Nzambì umweumwe awu ùdi ùkòòkesha pa Nkwasa wa butùmbi umweumwe awu leelù ewu. Ne nyumà wa mashimi umweumwe awu mmwenze cintu cimwècimwè aci leelù ewu, wàmба cipròfetà cyà mashimi.

¹⁵¹ Bâàkatùngunuka ne kwamba ne: “Ditalala, ditalala, ditalala,” paanyimà pàà Mvità yà Kumpàla yà Buloba bujimà.

¹⁵² Swâyì nnuleejè kwàkafùminaci. Mu Mvità yà Kumpàla yà Buloba bujimà, pàvwà France, kuntu kwàka, muumùke kùdì

Nzambì, mu Bidimu byàbò makumi citèèmà byà Dipaala abi, ne kutwàdijabo . . .

¹⁵³ Mpindyewu nendìbwînke mu myandà yà mu nsòmbelu, pa nànku shààlaayi bônsò ànu basòmbe pòlàà bwà tusunsa tukesè cyanàànà.

¹⁵⁴ Tàngilààyi, kale wàwa, ku cibangidilu, mu France mwàmwa, mmwômò amu ki mwàkatwàdija binyangu ne bukooya dyàmbedi. Piìkalàku kacya kwikàle nsangilu wa bukooyà pa buloba apa's, mmu Paris, mu France. Kàbidì nkààdi muyààyàyemù misangu yàbûngì, kàdi's ki mwaba mubyàmùbyàlè ûnkaadìku mumòne. Ne Londres, mu Angleterre kêna mwà kwepudiibwa to. Ne États-Unis mmubàtwe pèndè mu nyimà. Ncyà bushùwà. Ki bôbò abu.

¹⁵⁵ Musangu wônsò wûdì unyanga nsòmbelu mulenga wa bukàjì awu, udi unyanga mwongo wà ditunga.

¹⁵⁶ Paùyaayàku, mu matùngà àbò amu, kàdi wamba ne udi mpàndanjìlà, bôbò kî mbaswè . . . Bàmba ne: "Ciwùlwalwà kutwàmbila bwà twêtù kwenza ncinyì, mmùshindù wà twêtù kwimbila bakàji bëètù misambu yà manyaanù, anyì bwà bâna bëètù bàà bakàji? Udi ulwa kutwàmbila mùshindù wà twêtù kushipa mabàkà ne bakàji bëètù anyì? Kutùlongesha mùshindù wà twêtù kunwà Wiski ne kulonda njila yitùdì tulonda eyi anyì?" Aci's ki citùdì twêtù.

¹⁵⁷ Tudi tudibììkila nkààyetù ditunga dyà batèndeeli, ditunga dyà beena Kilstò. Èè, bôbò "bampànganù" bàà mu Âfrikè abu s'bàdi mwà kutùlongesha maalu à mu nsòmbelu, mùshindù wà kusòmba mu bantu. Mwaba ùdì, pàmwè ne kwikalà mutàmbe kubola, mu Étas-Unis, anyì, pa buloba, s'nditunga edi, mùdìdi dishàale emu. Mêmè ndi mwena Âmèrikè, cyà bushùwà. Kàdi, mwanèètù, ncyéna ne cîndì mwà kwenza to, nànsha kumpàla kwà Aakàbà anyì Yehoshàfâtà . . . Nènku bìkèngela ngàmbè cîdì Nzambì wàmba ne m'Bulelèlè. Aci's ke cîdì èkèleeziyà ùkèngela bwà kulamata, leelù ewu. Byôbì bìkèngela kusungula Nzambì anyì ditunga, ànu Nzambì, misangu yônsò. Éyowà's, mukalenge.

¹⁵⁸ Mònayai, mu France, bâàkatwàdija dibola dyàbò dyônsò adi, ne kutùngunuka mùshindù ùvvàbo bënda bàsòmbà kuntwaku awu. Ki pashiishe Nzambì kubatùminayè Allemagne, bwà kubàbàngulayè ndambù. Pashiishe twêtù kuya kuntwaku bwà kubàsùngidila. Nènku tudi benzè ànu twenza nànku, ne tucìmunà mvità, twipata beena Allemagne, twêtù kupeta ditalala ne France, bâàkapingana kùdì Nzambì anyì? To, mukalènge. Bakàjì, mvinyò, masandi, mpèkaatù ne bukooya too ne mu dibòdi.

¹⁵⁹ Pashiishe cyàkenzàbo ncinyì? Cyàkenzekà ncinyì? Apa ke mwaba wàkabangilàye. Dyabùlù kwasaye cyèndè cimamwendè wa bukalenge muntwamu. Ki mwaba wàkabangilàye awu's,

ànu apu mene, bwà kukoojisha nsòmbelu wa bàà pa buloba, byùmukila mu Paris, mu France.

¹⁶⁰ Pashìshe, bu nwènù mwà kumònà, kàvwa mwà kubwela muneemu ku mudimu wà bwambi ewu to, pa nànkú cintu cyàkènzanaye nkubwela mu Hollywood emu. Wàkajuula wendè Holl... E kwasayè cyèndè cimamwendè wa bukalenge muneemu mu Hollywood. Dyabùlù kwikilayè muneemu, kùkaadi bidimu ndambù, kùkaadi bidimu dikumi ne bitaanu anyì makumi àbìdì, ne cilwilu cyèndè cinène, e kuyayè, kwikila mu Hollywood, mu Californie. Kàdi yéyè kubùcikila Étas-Unis ne makolè èndè à demon. Ncyà bushùwà. Myòdelè yètù yônsò yidi yifumina ku Paris. Bàdi bayangata mu Hollywood, bàyiteeka pa bimwènenyi. Twânà twà bakàjì tukesè etu ne twânà twà balùme tukesè, ne bikwàbò, bàdi bàpàtuka mwaba ewu, bàdi bàbìbandila ku bimwènenyi abi.

¹⁶¹ Twânà tukesè twîmpè, tulùmyànà tukesè tulenga, ncyêna ne cîndì mfwila naatù to. Ñzambì àbèneshè myoyi yàtù mikesè ayi. Mwoyi wànyì ùdi ûmata mashi bwà bwalu bwàtù.

¹⁶² Nènku ànu mu cimenga emu, mvwa nyikilangana ne wanyi... umwe wa ku... mwanàànyì wa balùme, ditùkù adi. Yéyè ne: "Papa, bu ne kùvwa nsongààlùmè kampànda mwaba awu, mu cimenga amu, yìvwà ne Nyumà Mwîmpè," ne bikwàbò. Udi ùdikonka ne mbwà cinyì mvwa nya mutàngile ku Denver, mu Colorado, anyì mwaba kampànda mùshindù awu? Kufikisha bâna bàànyì mwaba kampànda ùdì musùmbà wà bantu bàdi bëèla mbilà kùdì Nzambì; ki citùdì tukèngela, mwanèètù.

¹⁶³ Ditùnga edi, cisàmbà eci, cimenga eci, mwaba ewu, mmushààle munyanguke maalu mu mùshindù wà ne bìdi byènza ne luse. Bu mêmè ànu mwà kwakula ànu mpindyewu cîndì mumanya menemene ne ncilelèlà ànu mwab'ewu, kî mbifwànyine nànsha kwikalà byà kuleeja kumpàla kwà batèèleji basambàkàna to. Anyì, ànu muneemu mu cimenga cyètù twêtù mene emu; kî ng'ànú muneemu to, kàdi mu myaba mikwàbò, myaba yônsò, mbibange kulwa ànu...

¹⁶⁴ Bwà cinyi? Bantu... Tàngilààyi, balunda bàànyì, citàmbe kwikalà ne budimu be. Mbilwè bipeepèle be, mu mùshindù wà ne cìdi cìkuvingila pansi. Dyabùlù ûwwa ne ciibidilu cyà kwikalà mu myòdelè. Mmuwfànyì kubènga kwikalà mupàtùke mu myòdelè, kàdi kî mmupàtùke mu mudimu to, ke mêmè ùdi unwàmbila aci awu. Úcidi ànu mu mudimu.

¹⁶⁵ Tàngilààyi, leelù ewu. Tudi twangata, ànu mungàmbì katancì kakesè emu, bwà inàbànzà mutekète, nsongààkàjì mukùlumpè mwikàle ne cilòngò cyà rose. Cileejilu, cilòngò cyà rose, ncilenga; cìdikù mbwà kwikalà kucitàngila, ncyà bushùwà. Nènku aci ncyenze ànu bu èkèleeziyà, ùdikù bwà kwikalabò bàmutàngila. Bu mukàjì mulengèle, ùdikù bwà kwikalabò bàmutàngila. Ncyà bushùwà. Kàdi yéyè... Yéyè ùdi bîmpè,

mbwena kwamba ne, ùdi mwîmpè kùdì bâyendè, yéyè—yéyè ùdi bîmpè. Kàdi yéyè kàyi ne mwelè wà mvitâ mupâtula wà nsòmbelu mulenga bwà kumulamawù to, ùdi ûshààla cipùmbishi mu bantu ne kùdì bantu; ùdi ûshààla wa ciipanshi ne wa cilèndwishi ne mubolè mu mùshindù wà ne nànscha mbwa miinè kayìyi mwà kumutàngila to. Ncyà bushùwà.

¹⁶⁶ Nènku ncintu cìmwècìmwè aci kùdì Èkèleeyiyà wa Nzambi udi ne mwoyi. Bàdi bàpâtuka mwab'ewu ne bâteeta kubàlakana ne kudìlongolola, kàdi kwenza maalu bu mùdì... Bàdi bâvùùlamù bakàji bààbò bilàmbà, ànu...kàdi bantu kî mbamanyè ne badémens bàdi munkaci mwà kubùcikila nzùbu yàbò to.

¹⁶⁷ Ànu ku mutumba kwànyì ditùkù dikwàbò, inâbànzà mutekète kampànda, ûndì ngèela meeji ne mmukàjì mulenga, kàbìdì mmukàjì musèla, ùdi ne mwânà, ki mukàjì mutekète awu kupâtukayè mwaba awu, balùme bapweka ne njila batàngile ku mudimu kampànda, kàdi inâbànzà mukesè ewu ùvwa mupâtuke pambèlù apu ne tulàmbà tukesè twà kale pambidi, byènza ne bwôwà.

¹⁶⁸ Ewu's mmuyiiki wà wènza bwôwà wà mu Ditùkù dyà Maamù, kàdi, mwanèètù wanyi, lekèla nkwambilè cintu kampànda: Maamù, àlukila bwà kwikala maamù kàbìdì!

¹⁶⁹ Too ne kânà kàà balùme kakesè kàvvà kalwè kusàmbangana ku beena mutumba bëètù aku, e kubwelakù kutwàmbila bwalu abu ne: "Tàngilààyi pambèlù pààpa."

Mêmè ne: "Èè, apu kapèèna cintu to."

¹⁷⁰ Mukàjì awu mmukàjì mwîmpè. Ncyêna ngàmba ne mmupange nsòmbelu mulenga to. Kàdi, bwalu bùdiku mbwà ne, kùdi nyumà mubi, wa bukooyà pambidi pèndè, udi umwenzeja cyôci aci, kàdi yéyè kî mmucimanyè to.

¹⁷¹ Ncinyi cìdi maamù mufwànyine kujingila pa buloba apa, anyì muntu kanà yônsò ewu, bwà kulwàta tulàmbà tukesè twà kale twà manyaanù, ne kudyànyika kumpàla kwà muntu mulùme? Udi mulengele, mwanèètù wa bakàji. Udi mulengele, maamù. Ndi nsàkidila Nzambi bwà bwalu bwèbè. Kàdi, udi mulengele, kàdi wêwè kùyì ne Nyumà Mwîmpè bwà kulama nsòmbelu wa bukàlànga awu to, bivwa bitàmbe bwîmpè bwà wêwè kwikala cibicibi wa nkotòto wa muntu kàyikù mwà kukutàngila to, kàdi kuya mu Dyulu. Ncyà bushùwà. Aci's ncilelèlè. Tàngilà ùmonè cyûdì wenza; maalu à nsòmbelu awu.

¹⁷² Mpindyewu, cìdiku ncyà ne, dyabùlù mmubwelè e kwambilayé bantu bintu ebi. Mmubwelè mu bayiishi abu; ùdi ûtentula Hollywod. Bansongààkàji ne bainâbànzà batekète, bàdi batentula Hollywood. Cintu citàmbe bwîmpè ku bintu bidibò naabì mu ditunga emu leelù, cyà cipangè nsòmbelu mulenga cyûdì mwà kutèeleja, nkvakula pa bintu kampànda; miyiiki yônsò yà ku tudyòmbà.

¹⁷³ Mukàjì kampànda mukùlakàjì bu Inâbànzà Kay Star, ncyêna nendè bwalu to; kàdi pa kumònà ànu mukàjì mukùlakàjì, wa bidimu makumi àtaanu, ne byônsò abi, ne bilàmbà byèndè byônsò bimwônyè ndêng, byènze bu nè bàvwa bamwèle mu mufuku wà bukula. Ncyêna ngamba aci bwà kwela bilèle to, bwalu ndi ngààkula ndyûla bintu abi. Kàdi mukàjì wènza maalu mùshindù awu, kàdi kwimana kuulu kàdi kwikalà cileejilu cyà bakàjì batékète bàà beena Âmèrikè, nkadìwù bwà ditùngà dyètù. Ndyabùlù.

¹⁷⁴ Balùmyànà bu mùdì Arthur Godfrey ne bakwàbò bâdì bânyùnguluka mwab'ewu aba, bènza bintu bìdibo bènza ebi, ne bantu baà batàmbe kumanyika mu ditùnga bàà mùshindù awu, ne, mònà's, mbundù.

¹⁷⁵ Àlèluuyàh! Ndi ngàmба aci bwalu ndi ngùùmvwa ne Nyumà Mwîmpè ùdi kaaba aka. Dibùcikila ki kwenzekadi eku, dyènda dìkòmba ku nzùbu ne ku nzùbu, ku mwaba ne ku mwaba, ku èkèleeziyà ne ku èkèleeziyà, ku muntu ne ku muntu.

¹⁷⁶ Bânà, mu Dînà dyà Yesù Kilistò, juukilaayi kuulu ne maalu mîmpè à mu nsòmbelu mushindàmeene pa ditabulija ne Mukalenge Yesù Kilistò, nwàmba ne: "Néndondè njila pàmwè ne banyààbanyà badyombola bàà Mukalenge." Èyowà's, mukalenge. "Mêmè nêngìikalè maamù mulelèlè." "Mêmè nêngìkalè papa mulelèlè."

Pàmbèngàbo kùdì buloba bujimà, ne
bônsò bâdì banyungùlkè, bônsò bâdì
banyungulùkile musùukà wànyì bayà,
Dîbà adi Yéyè ùdi ditèkemena dyànyì ne
eyeyemenu.

Bwalu pa Kilistò, Lubwebwe lushìndàme,
mpândì mwimane;
Myaba mikwàbò yônsò nduntekà,
Myaba mikwàbò yônsò . . .

¹⁷⁷ Ncinyì cìdì cilelè bintàkanyì byônsò ebi? Ncinyì cìdì cifikìshe bambi bwà kwenzabò mùshindù ewu? Ncinyì cìdì cyenzèje bayishi bwà kwambilabò bantu cipròfetà cyà mashimi?

¹⁷⁸ Bwà cinyì byàkenzeka, kùkaadi bidimu, ne nwénù ba-Méthodistes... Dîbà dìvvà mukùlumpè John Smith mùlwè ku cyambilu eku mwambula, bwà kuyiisha Èvànjeelìyò, ne kuyiishaye diyiisha dyà katùpà dyà mêbà ànaayi. Ne kwambayè ne: "Lutâtù lùdiku ndwà ne, mwoyi wànyì wùdi wùcìbuluka." Yéyè kwamba ne: "Bânà bàà bakàjì bàà ba-Méthodistes bàdi mene munkaci mwà kwela tukànu ku minu yàbò."

¹⁷⁹ Ne, leelù ewu, mbavwàle tûpùtlulù ne tulàmbà twà kale twà manyaanù. Ne nebàshaalè butaka huluhulu, mu bidimu bikwàbò bitaanu kumpàla eku, piikala cintu kampànda kaciyi cyenjiibwe. Cidì cinwenzèkèle nwénù bayishi bàà ba-Méthodistes, nwénù ba-Campbellites, nwénù ba-Baptistes

ncinyi? Èyowà, mukalenga. Ndyabùlù, udi mukùpe makolè èndè pansi, ne mmupàtùle tuunyumà twèndè tubì atu mwab'ewu.

¹⁸⁰ Kàdi kanwénà bacimanyè to, nwénù bádi munkaci mwà kunwà mfwankà, nwénù bakàjì, ne nwenza maalu munùdi munkaci mwà kwenza amu, ne nunwà maalà ne nwenza maalu à macimbu mûshindù unùdi nwènza amu, kanwénà bamanyè ne nudi munkaci mwà kulunga mubidi wènù awu, ne nubütula nkòngu mijimà yànùlondà paanyimà ayi, piikalàku cintu bu nànkú to. Byà pa lukàmà makumi mwandamukùlù ne bitaanu bïdi ne mpungà wa kupeta kànsérè, ku dinwà dyà mfwankà, kàdi nwénù nudi nubwelamù ne budiswile bwônso. Eku èkèleeyiyà pààyì yiçìitaba.

¹⁸¹ Mu èkèleeyiyà munène wa ba-Baptistes, anu mwaba ewu, àbìdì àdì pansi àà... Ndi ntua ba-Baptistes. Ndi ne bukenji bwà kwenza cyôci aci; bôbô bádi ànu bu beeýémène ku luseke lundi mufumíne. Kàdi pàvvabo ne cyà ku fila cipòòlù pankaci pàà mudimu wà kàlaasà kàà Dyàlumingu ne mudimu wà diyiisha, bwà ne mpaasàtà ne bônsô bààmònaku mwà kupàtuka bwà kanwà mfwankà, nènku mu mùsèèsù amu mùvwa balùme ne bakàjì bélè milongo munkaci mwà dinwa mfwankà. Dyabùlù ngudi mwenze cyôci aci. Ncyà bushùwà.

¹⁸² Pashiishe, muneemu mu cimenga cyètù mene emu, umwe wa ku bambi bëètù bàà batàmbe kumanyika, ànu lwà mu New Albany emu, mu cyôci cipalu emu, ke mudi umwe wa ku bambi bëètù bàà batàmbe kumanyika bàà mu cimenga emu ùlombwela ndongamu wa maja à bisumbù cyà balumè ne bakàjì bâja bâkwâtangana pambidi, bwà kubàndisha balùme ne bakàjì ku bibùmbà byà ku cyambilu.

¹⁸³ Kanùcyùkiku cìdì bàà pa buloba bàmba to, ncyénà ncyùka mûshindù unùdi nuteeta bwà kulòbeshanganyinakù amu to; mwanèètù, kakwèna mulùme wetù wa mbidi tumatumwa ewu ùpukila mukàjì wa mulùme mukwàbò, kàdi kàyì ùmvwa mbidi ûmuwayila to. Nudi bamanyè ne aci mbulelèlè.

¹⁸⁴ Mbangàte bakàjì bëètù, babàvùule bilàmbà; mu bîrò byàbò amu, ne bënda bëndesha taxi, bàbànda bapweka ne mùsèèsù. Pààbù, bàvwa ne cyà kwikala kumbèlu, paanyimà pàà mbàbùlù, munkaci mwà kulambà, ne kulongolola byàkudyà byà mundaamunyà.

¹⁸⁵ Ncinyi aci? Ndyabùlù. Dibùcikila nditwàdije. Ncyénà ngàmba cintu nànsha cìmwè bwà muntu nkààyà ewu anyì bwà muntu nkààyà wawa to. Ndi ngàmba ne nyumà yà bukooyà yìdi mikwàtè bantu, yìbabweja ànu mu cyôci aci. Dibùcikila dyà États-Unis.

¹⁸⁶ Ndítònkoka dyà èkèleeyiyà. Èkèleeyiyà mmutònkola kùdi dyabùlù. Kale wàwa...

¹⁸⁷ Bâdi bàngata nsongààlùmè mpindyewu, pàdìye ufika mu sémìnérè, cintu cyà kumpàla cìdiye ne cyà kulonga nkwanji kupeta dìpòlomè dyèndè. Ùdi ne cyà kulonga maalu à mùdì kusòmba. Ùdi ne cyà kulonga tèòlòji. Ùdi ne cyà kulongesha, kupeta malongesha à mìshindù yônsò mamufinyika munda mwèndè. Piìkalàye kàyì mupetè nkolèshèlu mulelèlè mulengèle, yéyè kàyì wa meeji matwe ne lungènyi lutwè mùdiye mwà kwikala to, dîbà adi nebàmwipâtè; kénà mwà kukùmbana to. Ncinyì cìdiye ne cyà kwenza? Nkupàtuka mwab'ewu, kuya kenza bu muyiki mukesè wà cìdiidì, muyikì wà cìdiidì wà mu èkèleeziyà, kùdì musùmbà wà bantu, musùmbà wà balùme ne bakàjì biikàle bàpùnga ne lufù.

¹⁸⁸ Éyi Nzambi, tutùmìneku bantu kampànda bàà cyena-kale, bakàyàbàle bâdì kabàyì bamanye mwà kusunguluja A ne B to, bâdì bamanyè bukolè bwà dibìükà dyà ku lufù dyà Mukalenge Yesù Kilistò, bìukala mwà kuyiisha kanyinganyinga, ne kutùma balùme ne bakàjì ku cyoshelu, bwà kunanga Mukalenge Yesù. [Katùpà kàà mukàbà wà mèyì munda mutupu—Muf.]

¹⁸⁹ Nkadìwu. Mmubùcikile ma-sémìnérè. Mmubùcikile maèkèleeziyà. Mmuvùule bakàjì bëètù bilàmbà. Mmufikishe balùmè bëètù mu mìshindù wà kùyì mwà kubàmbilaku cintu to. Ne balùme ne bakàjì, ngèèla meeji...

¹⁹⁰ Wêwè udi wamba ne: “Èè, bakàjì abu.” Èyowà, ne nwènù balùme bàànyishila bakàjì bëènù bwà kwenzabò aci, aci cidi cileeja cinùdì. Aci's ncyôci menemene. Ncyà bushùwà menemene. Mbundù. Byènza luse be.

¹⁹¹ Ne pashiìshe too ne kùdì muyiishi. Muyiishi awu mmwimàne pa cibùmbà cyà ku cyambilu, leelù ewu, cyà cyambilu cyà cyena-leelù. Mwimàne mwaba awu, ne bantu bëndè kumpàla kwèndè, kàdì kuyiisha bwà kantu ne kantu kônsò kakesè kàà kale kàà pa buloba aku pa kuumusha kanyinganyinga ne mpèkaatù, ne nkùrusè mukàyàbàle wa Kilistò awu. Èyowà.

¹⁹² Paùdì utèèka bulelèlè pansi; bantu nebàlwé kukutèèleja, mu mudimu wa butangadiki. Udi uteeta kufika ku kiipàcìlà ne kuyiisha Èvànjeeliyò, kufikisha bantu ku dinyingalala ne kubààkaja. Nebàjuuke e kupàtukabò, kí mbenzèjìlbwa bwa kuMutèèleja to. To, kí mbenzèjìlbwa to. Kàdì, bânà bëètù, nebìukalè ne cyà kunyingalala anyì kubùtuka.

¹⁹³ Badémons! Nuyààya mu cilongelu; mmubùcikile bilongelu. Kènzakanààyi, mu ditùnga leelù ewu. Tàngilààyi kunweku, nwènù balùmyàà, nwènù beena Mishòonyi. Tàngilààyi, kùdì bilongelu binène bìnaayi byà Kàtòlikè ne bikwàbò, bìdi biibaka leelù ewu. Mbwà cinyì bìdi nànkú? Nudi munkacì mwà kuumusha bimanu byà mikàlu.

¹⁹⁴ Ncyénà ne cíndì mfwìla ne bwena Kàtòlikè to, nànscha mûndì ncyì mbwìtabuuja amu. Mêmè ndi mwena Mishòonyì wa muumishe maalu ncyông. Ncyà bushùwà menemene. Nudikù

mwà kujaadika ne kabèèna... Kanwèna mwà kukòkangana naabò to. Bôbò bâdi bàmba ne: "Twêtù katwèna tucyùka cìdì Bible wàmба to. Tudi bamanyè cìdì èkèleeziyà wàmба aci."

¹⁹⁵ Nzambì ùdi mu Dîyì Dyèndè. *Ewu* ki mwaba ùdì Nzambì ûsanganyiibwa.

¹⁹⁶ Kàdi bàmwè bàà ku beena Kàtòlikè, mbalamàte ku èkèleeziyà wabò, mbafwànyìne kukufwisha bundù, wéwè bu mwena Mishòonyì. Bu wéwè mwà kulamatakù ànu ku Bible, bu mùdibo bàlamata ku èkèleeziyà wabò amu. Mbîmpè. Kàdi, mbapiile. Ndi mwà kwamba cyôcì aci ku bukòòkeshi bwà Nzambì wa Bukolè bwônsò, ne, bôbò mbapiile. Kakuyì mpata nànsha.

¹⁹⁷ Ne nwêñù beena Mishòonyì pèènù nudi bapiile, mùshindù unùdì nwenza maalu, bwalu's nudi bamanyè menemene cìdì citàmbe bwîmpè, kàdi nudi nucyènza. Aci cìdi cinùpâtula beena lubombo. Ncyà bushùwà, ndibùcikila; maèkèleeziyà mmuumùshe mikàlu. Kàdi mpindyewu pamutù pàà...

¹⁹⁸ Èkèleeziyà, ùteeta bwà kuvwija èkèleeziyà mulenga, kwibaka èkèleeziyà mutàmbe bunène, kwasapù miketa minène, bisanji binène byà orgues ne kupeta cintu ne cintu cyônsò bâteeta kutentula èkèleeziyà wa Kàtòlikè. Nwêñù kabyèna bìnùkèngela bwà kutentula èkèleeziyà wa Kàtòlikè nànsha, pììkalaye mulongolwela dibütuka. Bwalu, aci ng'EMU MÙDÌ MUKALENGA WAMBA, mmulongolwela diya dyà mu dibütuka. Kàdi mwine awu ke unùdì nutentula, nuyààya nendè.

¹⁹⁹ Kàdi citùdi tukèngela leelù ewu, ki ng'èkèleeziyà munène to, muketa munène to, mbyoshelu byà cyen-kale bìdì mpèkaatù yòshibwapù yìbütùdiibwa, mu masambila malàmbula à kùdì balùme ne bakàjì bâdi banangè Mukalenge Yesù Kilistò. Nudi bamanyè aci. Ki cìdi citùkèngelà ncyôcì aci. nteèlèjaayi, nwêñù balundà bàànyì. Ntèèlèjaayi. Ndinanga.

²⁰⁰ Dibà dyànyì dyayi. Mvw'a kujinga ànu kujèmbeelapù, mwaba awu, ànu, nencyangàte, ànu pashiishe ndambu, dibùcikila adi, kùdidi díkafikè. Ndibùcikile. Ndibùcikile matungà ètù. Ndibùcikile Étas-Unis.

²⁰¹ Mpindyewu vùlukàayi ne, kacya ncìtu mwêle kakàndà kacya bândela, nwamònou's, aci kî ncintu cyà kuditàmbishila to, awu's mmakenji ànyì à bwânàbutè à bwena Amèrikè bwà mêmè muswè kucyènza. Kàdi balundà bàànyì bâdi ne mushinga wàbûngì be kundi, nciyi muswe kubàbwejamù to. Tàngilààyi, nkààdi mubàmòne bakabwelamù bu bantu bîmpè, bàmùpâtuka beena mucimà, nènku mêmè ncyèna muswè aci to.

²⁰² Ndi ne cintu cìmwèpelè. Ndi mwab'ewu munkaci mwà kwibaka cibùmbà cyà cyambilu bwà Muntu umwèpelè Udi Mufile mpàla, ne mwinè awu n'Yesù Kilistò, ne ànu Yéyè nkààyendè. Ndi mMupèèsha dìbà dyànyì. Ncyà bushùwà. Kàdi

bu mêmè mwà kululamija èkèleeyiyà, aci necitangile bwalu bwa bakwàbò bàà pa buloba. Ncyà bushùwà.

²⁰³ Kàdi lekèlaayi nnwambilè, pàvvà Mukalenge Roosevelt (Muntu awu ùkaadi mufwè, yikishe, ndi ngìtabuuja ne mmwikishe.), wàkabwela e kufila mpàla misangu yisàtù anyì yinaayi, ne kucìmunayè, ciine aci ànu mbangilu wa cimbàmbilà, ndi mwà kunujaadikilaci mu Mifundu, mwaba wûmvwà mwambe ne ncyènzekè. Ncyà bushùwà. Katùcyènà kàbìdì ne Dîyì dikùlù dyà ditunga to, dikaadi dikòsolola tutùpàtutùpà, cintu cyônsò ncyenjìibwe ne mapeepeleji. Ba Républicains bâdi ànu babì, bintu abi mmânyì mu nkùnde nkùnde mu mânyì.

²⁰⁴ Bwalu bukalenge bwônsò nebùvingutudiibwè, kàdi Bukalenge bwà Yesù Kilistò nebùimanè tèndè ne neàkokeshé kashidi. Ncyà bushùwà. Pa... Danyèlè ùmwènene dibwe dilamuna ku mikùnà, ne kukùmàdi maalu à cìdìidì awu ne kuàvinga kuàshiya lupwishi mùshindù awu, ànu bu mùdì blé pa cishipwidi mu muvù wà luuyà. Kàdi Lubwebwe alu lwàkadyunda e kushààla mukùnà munène wàkaalabalà ku mu mau... wàkùja maulu ne buloba. Ki bwalu mbwàbù's.

²⁰⁵ Maalu à cìdìidì mmamanè kujika. Ditunga dyètù ndivingütükè. Nwvùlukaayi aci, ne Mwanèètù Branham mmwambè nànku, EMU MMÙDÌ MUKALENGE WÀMBA. Ditungà dyètù ndishimbùdùbbwe. Kadyàdyàkujuukèè. Ndimanè kufwà, ànu bu mùdì matunga makwàbò wônsò amu. Ndítunga ditàmbe bunène pa buloba, dìdì ditwè makàsà pansi leelù ewu, kàdi ndimiinu dimwèdimwè dyà dyabùlù dìdì dikùnyìibwa mu myoyi yà bantu; mùshindù wàkabwelàdi mu Hollywood, mùshindù wàkapàtukàdi kubwela mu bantu, ne kubangila ku cikampànda. Kàdi kwèna mwà kubàmbila ní ncinyì ní ncinyì to.

²⁰⁶ Tèèkaayimu ànu Mfumù wâteeta bwà kukàndika wiski, mpindyeuwà kàdi kwela mukàndu, nùmònè cìdi cifwànyìne kwenzeka. Mbafwànyìne kumwasa, mu mèbà àbìdì paanyimà pàà yéyè mananè kubwelamù. Bushùwà, yéyè kêna mwà kucìtwala to; buloba bujimà bùdì bùmulwisha. Èyowà's, mukalenge. Kùvwa mwà kucyènza to.

²⁰⁷ Ndimane kufwà. Ndimana kubùcikila, ne nyumà wa communisme mmumanè kucìmuna.

²⁰⁸ Ndàayi ku bilongelu byétù leelù ewu, tàngilààyi bânà bëètù bàà mu túlaasà. Bânà bëètù bakesè bàyaayà mu túlaasà, nuvvakù ne cyà kumanya bìdì byènzekamu. Twânà twà bakàjì tutekète kwinshì eku mu bilongelu, ne bintu byà mùshindù awu, twà bidimu dikumi ne binaayi ne dikumi ne bïtaanu, baamamwabò babàtùme mu cilongelu, banyangùke mu nsòmbelu, mu meeji, bakwàciki bàà bintu byà lulengu, banù bàà dyamba, banù bàà mfwankà, bikwàbò byônsò mùshindù awu; bacìikale ne bidimu bikesè menemene, bânà bakesè mùshindù awu. Mbifwànyìne kwikala bikolè bwà kupeta mukàjì virgò

munkaci mwàbò ànu mùdibì bifwànyìne kwikala bikolè bwà kupeta kashìngì mu mushikì wà bisonsà, pàdibò båpatuka ne mbulankètè ne bânà båà balùme, ne badyàdi ja ku mpengà kwà musùlù ne myaba mikwàbò yônsò.

²⁰⁹ Nènku ndi mwà kunùjaadikilaci, balunda bànyì. Ncyèna mwà kucyàmbila mu cyambilu pândì ncìyi mumanyè cîndì ngàmba to. Bwà bilongelu bìdì mu byètù—byètù bitùpa byà malaba ebi, ànu mu bitùpa byètù byà malaba ebi, bwà mvwàdilu wa tuuinàbànza tukesè etu, ncyèna mumanyè to...bàmbila baamamwåbò ne bådi båya mu myaba mishììlàngane, kàdi båkatwìlangana ne bânà båà balùme kàbìdì båkenda too ne masandi mu mìsèèsù yà mu Louisville (Ncinyì aci?), wa bwalu bimba misambu mu kòralè.

²¹⁰ Bwalu, bådi ne Èvànjeelìyò wa buwetù mukesè wa kale mwimàne mwabwa awu, mùdì bayishi biìmàne ne båàkula bwà tuntu tukesè katùyì ne mushinga, ne tuumaalu-malonda tukesè twà mu Bible, anyì cintu kampànda cyà mùshindù awu, pamutù pàa kuyiisha kanyinganyinga ne kutwàla balùme ne bakàjì ku cyoshelu.

²¹¹ Papa wendè ùdi ùbwela butùkù ne ùtápisha cifwankà cyèndè, wàngata verre wa bière, ùsòmba panshi ne ùmunuwà. Maamù mmupàtuke, mundaamunya, ne musùmbà wà bakàjì nendè mu difestò kampànda dyà ditwà dyà kartà, byà mu nsòmbelu kampànda wa mùshindù awu. Mmunyì munùdì nutèkemena bwà mwânà kwikalayè cîngà cintu?

²¹² Tångilààyi, mu nyùngulukilu kanà yônsò mùdì musòmbèle, ke cyûdì.

²¹³ Angàtà kânà kàà bakàjì katekète, kânà kàà balùme katekète, ùbâtèèkè mwab'ewu, ùbàlekèlè bàsòmba ne muntu kampànda. Angàtà muntu mulùme, ndi mwà kwangata mwanàànyì wa balùme, kumulekela ùpàtuka ditùkù dijimà ne muntu kampànda; pàndì ngààlukila, ndi mwà kukwambila misangu yônsò muntu uvwayè nendè. Ncyà bushùwà menemene. Tångilààyi, nyùngulukilu awu, nyumà awu ùdi ùmubàkùla.

²¹⁴ Udi ubwela mu èkèleeyiyà, mùdì bantu bônsò... udi ubwela mu èkèleeyiyà wa Nyumà Mwîmpè, anyì—anyì èkèleeyiyà yà beena Mpenta, mùdibò båyìbìkila amu. Bantu bônsò bìikalè... Kaa, bådi bànyeemakana banyukusha mutù båtùma paanyimà båtùma kumpàla, mpaasàtå wenza nànnku awu; tångilààyi mùdì èkèleeyiyà mujimà awu ùbanga kwenza cintu cimwècimwè aci. Lekélà bantu balùme, cisàmbà, båjuuke ne—ne bëenza maalu à macimbu àdì ènza bwòwà, anyì cintu kampànda cikwàbò; tångilààyi cintu cyônsò cidi cìcyènza. Bwelààyi mu mwaba ùdi mpaasàtå muumàkàne ne mukwàte mashìka; tångilààyi mùdì musùmbà wônsò awu ùcyènza. Udi ubwela mu nyùngulukilu awu.

²¹⁵ Wêwè mwangâte muntu udi ne nsombèlu mulenga, kâdi lekèlâ àkasèlè kakâjâànà kâà kale kâdì kakâyi ne mushingaaku; kaabyâkunènga to bwà kwikalayè pèndè kâyi ne mushinga. Ki cyâkenzekelâ Aakâbâ. Angâtâyì cîmwècîmwè aci, cyanza mwandamuna, lekèlaayi ànu mukâji mukesè mulengèle àasedibwè kûdî mulùme udi kâyi ne bujitu to; katancì aka anyi, mukâji awu ùdi wènza bintu bimwèbimwè bìdî mulùme awu wènza.

²¹⁶ Mùshindù mwine ûndì mwà kuya, mu dîndà emu, ne kufunkuna byanza byânyi ku nzùbu yidi mifwè ne bintu byâ mùshindù awu, mùdî bamaamù batekète bananga bàbwela kûdî papa kanwâyi, ne bintu byâ mùshindù awu, bëèla meeji ne mbafwânyîne kumwambulwisha, kadi mpindyewu byônsò bïkaadi maamu awu ne bônsò mbadibwinke mu kunwà kwâ maalà bashidimbe. Bwàlu mbwà nyûngulukilu.

²¹⁷ Ncinyi aci? Ndyabùlù, dibùcikila. Mmudifindè mu ditunga edi, bu mùdî ntambwe ûkungula. Mmudisòmbèsha mùnwemu emu mu mwaba mutàmbe bwîmpè ûvvâbo naawù, mu Hollywood. Kwambayè ne: "Ndi mwà kwangata bindidimbì byâ mu sendêma too ne mwàlwà télèvìsiyô, dîbâ adi nembabâkûle." Ki kusòmbayè mwab'ewu.

²¹⁸ Nènku bantu bàà mu èkèleeziyà, pamutù pàà kukàngabò sèndêma ne kukàndika bânà bààbò bwà kuyamù, bôbò bâdi bàbâpèèsha centimes dikumi mu dyàlumingu mu mapingaja ne bàbâtùma muntwamu, bwà bààmònâ mwà kukatwàku kartâ kâà bulundà, bàpàtuka nkàayabò bênda bànyùnguluka. Kaa, bundù kaayi's. Mpindyewu bâdi ànu bàkângula télèvìziyô ne bàbandila bintu byônsò byâ bukooya, byâ macimbu bibolè bìdî pa buloba, ku cyôci aci. Ncyà bushùwà.

²¹⁹ Mêmè ncyèna ne bwalu ne sèndêma to. Ncyèna bwalu ne télèvìziyô to. Bwalu mbwà cintu cibolè cîdimu aci. Ki bwalu mbwôbò abu. Bu nwènù bacìlama cikezuke, nùnku ncishâàla cikezuke.

²²⁰ Kwénà mwà kusùmbisha bisàbatà byâ cyena-kale byâ mbòta abi, leelù ewu, mu cimenga emu to, nànsha kakesè. Bakâjì ki mbabiswè nànsha. Mbaswè byâ twâñà twà nkàsà tupâtükemù abi. Bakâjì bàkwâbò bônsò bâdi bènza aci. Ncyà bushùwà.

²²¹ Paùdì uya mu èkèleeziyà, kwéna mwà kubàsùmbisha ntèndeeluu wa kale awu to, bwalu, mukâji mukwâbò awu, ki mmuswè to, to, kénâ naabi bwalu to. To, mukalenge. "Mêmè ncyèna dijina ne kuya kuntwaku to. Ndi ànu ngìitabuuja, ke cyônsò cîdîku." Kaa, mwanèètù, dyabùlù ùtu wìtabuuja, pèndè. Mmwômò. Neùnyingalalè anyì udi ubùtuka.

²²² Mpindyewu, mfwìlaayiku luse; to, ncyèna ndòmba luse to. To, ncyèna ndòmba luse to. To, ngûmushi dilòmba dyà luse adi. Ntu munangè bantu. Kâdì ndi—ndi—ndi—ndi mutamba kunùnanga bwà kunùmònâ nukadiìnàmù ne mitù miinyika

mùshindù awu. Bu Nzambì mwà kuswà, nempinganyinèpu pashìishe ndambu mu lumingu emu.

²²³ Mpindyewu, kunùdì nwénù baamaamù bàdì baamaamù, ànu díyì dìmwèpelè cyanàànà bwènù nwénù kumpàla kwà kuya. Nzambì ànùbènèshe. Kolèshaayi bânà bèènù mu mushindu mujalàme.

²²⁴ Netwàngatululè dibùcikila edi; tucìdi ne cyà kubwela naaci too ne mu mbànzà, ne myaba yàbúngì, bilongelu, ne kuya naaci mu myaba yàbúngì. Netùcyangàtùlùle.

²²⁵ Kàdi, dibùcikila dyà États-Unis, dyabùlù mmumucìmùne. Kanùcìnyi Russie to. Russie kénà ne bwalu to. Tudi tudyènzelaci twêtù nkààyetù, dibola dyètù nkààyetù ànu munkaci mwètù mene. Ncyà bushùwà.

²²⁶ Nudi bamanyè ne, États-Unis ùdi ne difwà dyà mabàkà kutàmba matunga ônsò à pa buloba anyì? Difwà dyà mabàkà dipite bûngì; elààyibi meeji pa bwalu ebu. Kabyéna byènza bwôwa anyì? Buumaamù mbufwè. Baamaamù kabàcyèna bâshààla kabidì kumbèlu ne bânà bâàbò balela, mùvvwàbì pa cìibidilu amu to. Bidi bìbàkèngela kwikalabò ne mudimu.

²²⁷ Munwemu ditùkù adi, mutu kampànda musùmbishi wa byàkudyà mu cimenga emu, nguvwa undondela bwalu abu. Bakàjì bàdì bènza mudimu mu byapù binène ebi, bakàjì basèla batekête aba ne musùmbà wà bânà bakesè. Bàdi ne bandeeji bàdi bâkòwelela bânà bâàbò bàà mu mabòko. Bàdi bènza midimu mu byàpù ebi. Yéyè ne: “Kùvwa bàbìdi bâàbò biimàne kuntwaku, pàvvwàbo biipàciìbwe, mu cyapù cyàbò amu, kwambabo ne: ‘Kùtacishi meeji to. Netùditàmbàkèènè, nànsha bishi.’”

²²⁸ Kaa, dîba dyà bundumbà didìku edi. Mmwômò. Dyabùlù mmubambile bulelèlè ne bôbò mbamfùmù bâà nzùbu. Nebàdikèbèle mfranga yàbò yà sungsunga. Nebènżè cìdìbo bâjinga kwenza aci. Kàdi teetàku bwà kubàtùla ku cyôcì aci tûng, ní wafudisha's.

²²⁹ Kùdi cintu ànu cìmwèpelè cìdì mwà kucipàtula munda mwàbò, ncyoshelu, kumpàlè kwà Yesù Kilistò, ntèndeleelu wa cyena-kale, wa binsònji bìpweka wîkala mwà kupanda myoyi yàbò ne kuyisunsulula tupese tupese, ne kubènza cìdìbo ne cyà kwikalaka. Ncyà bushùwà.

²³⁰ Bàdi mwà kwela meeji ne ndi mununu wa meeji à cyena kale. Kàdi ditùkù diwîkala upünga ne lufù, mwanèètù wa balùme, mwanèètù wa bakajì, neùmanyè ne mvwa munwàmbile Bulelèlè. Ncyà bushùwà.

²³¹ Dibùcikila, dìdi dìlwa, dîbà dìkaadì dikùmbàne. Mpindyewu, mpindyewu, èyowà, dîbà dyà dipàngadika, kàbìdì, dîbà dyà dipàngadika, ki ndyà kulwa mu èkèleeliziyà to, kàdi ndîbà dyà dipàngadika dyà ne neùsadilè Kilistò anyì peeshì

neùshaale wa civùmvù mu èkèleeziyà webè. Nènku ncyà bushùwà.

²³² Kùdi bidimba byà èkèleeziyà bûngì cyanàànà. Bu bidimba byôns-... anyì bantu bàà mu Amèrikè, bàdì bàmba mùdibo beena Kilistò abu, bafwànyine kwikala beena Kilistò balelèlà, beena Kilistò baledibwe cyàkàbìdì, mwanèètù, tuvwa mwà kwikala mu dikùbiibwa ànu munùvvà bafwànyine kwikala mu Dyulu, bu nànku's, bakùbiibwa ku mvità ne ku ntàtu, èyowà's, mukalenge, màsaamà àvwa mwà kuumuka mu ditunga, ne bikwàbò byônsò.

²³³ Kàbìvwaku mwà kwikala bímpè anyì bwà kupweka ne mùsèèsù ne kumònà kùdì inàbànzà ùlwila, ne mulùme awu ne: "Wetwàwu, mwanèètù wa bakàjì? Mwoyi awu, mwanèètù wa balùme"? Ulwa, kakuyi... Kuyi ne didyàbakeena nànsha dimwè pa buloba to. Bintu byônsò bilengèle ne byà disànkà. Ne mulùmyànà udi ulwa mu disangu dyà mùsèèsù; pamutù pàà kukutuuta kukupità, ùvwa mwà kwimanyika, kwamba ne: "Èyo, mwanèètù. Èyo, wêwè uvwa ne... Kaa, wêwè nda kumpàla kwanyì," nudi numònà's, ùjinga ànu... Aci kî ncifwànyinekù kwikala cilenga cyà dikèma anyì? [Disangisha dìdi dyàmba ne: "Amen."—Muf.] Netwìkalè naaci, kàdi aci mmu Bukalenge bwà bidimu cinunu, mwanèètù. Ditukù dìdi ànu dyenda dilwa. Ncyà bushùwà. Pa nànku mpindyewu katwèna...

²³⁴ Mvwa mwimàne ku mutumba kwètù, munwemu ditukù adi; ncyèna bwalu ne mutumba wètù to, kàdi ndi mwà kumònà bânà bètù batekète aba. Mukàjàànyì ùvwa ûdila. Ngàngàbukà kampànda wa mu cimenga emu, mwanèndè wa bakàjì mutekète ùvwa wènda ùnyùnguluka ne mwanàànyì mutekète wa bakàjì, nènku mbanangàngànè; too ne mùwwidilàbo kujandula ne dinà dyèndè ùvwa Branham, ne ùvwa mwâna wa Rév. Branham. Aci kàdi kukòsaci bwalu. Mwâna mukesè wa bakàjì awu kàvwa mwà kwenda kàbìdì ne mwanàànyì mukesè wa bakàjì awu to. "Ekèlekèle," mêmè kudyàmbidila ne: "èè, mbímpè."

²³⁵ Bàmwè bàà ku beena mutumba naanyi bakesè kuya kuntwàku, kwambabo ne: "Èè, bìvwa ànu bímpè." Pa nànku, kuyabò kùdì mpaasàtà wabò. Kùngambìdikù to. Nudi bamanyè's, ntu—ntu ne mùshindù wà kumanya bintu byàbûngì, nudi numònà's. Pa nànku bôbò—bôbò kuya kùdì mpaasàtà wabò, e kwamba ne: "Udi mumanyè's, kùdi muntu musòmbèlé ku mutumba kwètù aku, ùdi ne maalu malenga be kùdì bânà bètù balela." Kwambabo ne: "N'Rev. Branham. Ùdi ùbàngata ùbàpàya mu kàshinyì kèndè kakesè kàà kale aku, ne ùkanyùnguluka naabò."

²³⁶ Yéyè ne: "Èè, uh, *Eyo!* Katwèna ne cilumbù ne Rév. Branham to. Ùdi bímpè, kàdi, nudi numònà's, yéyè's ùdi ànu muntu wa cipidi cishìllàngànè ne citùdi twêtù eci." Èyowà. "Twêtù, mvwa—mvw'a kujinga ne kanwìkadi... nudi

bamanyè's, ncyènaku muswè ne . . . Udi mwà kwakula naabò, ne kwikalà ne musàngeelu, kàdi lekela aci cìikàlè ndekeelu."

²³⁷ Kaa, mwanèètù! Mukàjàànyì ùvwa mwimàne mwaba awu, udila mwadi. Mêmè ne: "Munanga wanyì, s'ke cidi cìtùtápulula's. Bwanyì mêmè ne nzùbu wanyì, netùsadilè Mukalenge."

²³⁸ Nànscha buloba bwônsò bumbènge; ànu Yesù Kilistò! Nànscha byôbì bikèngela ne mbiikidiibwe ne mukoleshi wa maalu, byôbì bikèngela kwikalà mudyombòdïbwè kùdi bilongo byàn- . . . bantu naanyì, ne bintu byà mùshindù awu, Nênsungulè ànu Yesù Kilistò. Kwàta ku cyanza cyà Nzambì cidi kaciyi cishintuluka to. Pààkulekela balunda bàà pa buloba, shààla ànu mutambe kuMulamata. Mukwàte Yéyè.

²³⁹ Nzambì, swâkù nyiishe mûntù kacya ncìiyì muyiishekù kumpàla. Swâkù nyiishe bantu bàdì bàpunga ne lufù aba, bu muntu udi upungà ne lufù, mêmè mwine. Swâkù nyiishe bantu byènze bu ne ncyàkwikalekù ne mpunga wa kuyiisha dikwàbò diyiisha nànscha. Swâkù mbenzèjè bwà kulwabò ku cyoshelu eku, ne binsònji byènda bítùnkumukila kwíssù kwàbò; bààlukila kumbèlu bakasòmba bu beena Kilistò, ne bàsòmba nànku ne mitumba yàbò. Biàmanyika cinkenyà cyônsò eci ne ditàmbàkana, ditùpika ne lukutukutu; ne dyenza maalu mùshindù ewu, ne kubìnduluka bwà cikampànda, ne kuya mùshindù kansanga. Kaa, kanwènji nànku to. Aci's ndyabùlù. Nyumà yà badémons ayi yikila beena Kilistò.

²⁴⁰ Vùlukààyi ne, bambi abu kuntwaku, bàvwa bapròfetà abu. Bàvwa bapròfetà. Bàvwa batèndeleeti, bàlàmbula mulàmbù. Bàvwa batèndeleeti ànu müdì balongeshi bônsò bàà ditùkù edi, kàdi, mwanèètù, bàvwa ntàntà mule ne kumanya bulelèlè.

²⁴¹ Kanwènakù numòna müdì dyabùlù mutèndeleeti anyì? Dyabùlù kî mubengyanga-, kî ncintu cinène citàmbe bu müdì communisme, cibèngangana ne bwena Kilistò mu byônsò to. Kî ng'aci nànscha. Aci ncyà, kaa, èè, ncyà dyabùlù, bushùwà, kadi kî ncifwilakanyi ne Kilistò to. Mufwilakanyi ne Kilistò mmutèndeleeti wa menemene, mmutèndeleeti wa menemene. S'ùvwa n'nyumà wa butèndeleeti wâkapopela Yesù pa nkùrusè. Cìtu misang yônsò ànu bukwa ntèndeleeti, batèndeleeti, bàdì bàpopelanganà pa nkùrusè. Mbatèndeleeti bàvwa bàlwisha Kilistò mulelèlè. Mbapròfetà batèndeleeti bàvvà bàlwisha Miikà. Mbatèndeleeti bàà mu ditùkù edi bàdì bàlwisha Mukenji wà Nzambì.

²⁴² Vùlukààyi ne, ndi munùdimwìje. Ndi munwambile. Ncyèna ntàmba kwakula nangànangà bwà bwena Kátolikè, ne ba-Baptistes ne ba-Méhtodistes to; Ndi ngààkula ànu bwà bantu beena cijila, ànu kwinshì kwà milongo eku. Cìtàngilaayi leelù, müdici cisambulùke ne ciimàne mu dinàya. Kaa, ekélékèle. Ntu mbwelamù, mîngà misangu. Ne mwoyi wànyì üncibùlùka munda mwànyì emu.

²⁴³ Muntu mwimàne kuntwaku ne banjo wa kale, ùtuuta banjo wa kale awu, ne wìmbà cindànda aci mùshindù awu ne: “Ewu n’cowboy wa ku Texas Kampànda awu anyi?” Ncyèna ne cîndì mfwila ne muntu awu to; kàdi abi mikùmbànyìna pambèlù pààpa mu maalu à pa buloba pambèlù pààpa. Ncyà bushùwà. Mbipicìibwa ne mêmè mwimàne, mwanèètù, nciyi nànsha ne cintu to, cyà ne, nciyi ne cintu nànsha cìmwè to, kàdi ngìimana ànu kuulu ngàmba ne: “Yesù, ndamèku pabwîpì ne nkùrusè.” Èyowà’s, mukalenge.

Nkùrusè mulàmbula awu nemmwambùle,
Too ne mwàmpeesa lufù budìshikaminyi,
Pashìishe ngààlukilè Kwètù, bwà kuya kaasa
cifulu cyà butùmbi,
Bwalu kùdi cifulu cyà butùmbi bwànyì mêmè.

²⁴⁴ Bwènù nwènù baamaamù batekète mwab’ewu mu dìndà emu, bâdi baamaamù bâà cyà bushùwà, ne ndi mumanyè ne kùdi bâàbûngì bëènù; Ndi ngèèla meeji ne, yônsò wa kunùdì. Lekèlaayi nnwàmbilèku cintu kampànda. Nzambì ànùbènèshè. Nwènù nudi Èvànjeelyò mwitânù, mmundi ngèèla meeji. Lekèlaayi nnwàmbilèku mpindyewu bwà bânà bëènù balela, kantu kakesè cyanàànà. Bwalu, Mwanèètù Neville pàmwàpa neàyiishè pa . . . bwà maamù dilòòlò edi, anyi ní nganyì mukwàbò, umwe wa kutùdì udi uyisha, mbîmpè, pa bwalu bwà maamù. Kàdi, tèèlejààyi, nganjì nnùkonkèku cintu kampànda.

²⁴⁵ Vùlkààyi ne, pàvwà Môsà mwânà wa balume mutekète, maamù ke wakamulongesha. Ùvwa mmaamù wa difwàna dyà Nzambì wakambula Môsà mukesè awu pa binù byèndè, wàmba ne: “Môsà,” kumulongesha byônsò. Ùvwa mulongeshi wendè, anyì, maamù ùvwa mulongeshi wendè, èyowà’s, mu bukòòkeshi bwà Pâlò, ne kwambayè ne: “Mpindyewu, bintu ebi,” mwàkambàye, “Môsà, dîngà ditùkù neùsungilè bânà bâà Izàlèèlè. Wêwè ki mwânà wa balùme mubììkìdiibwa. Dìlamè wêwè mwinè mukezùke kùyì katòba ku maalu à pa buloba, bwàlu wêwè ki mwânà awu. Wêwè ki yéyè awu.”

²⁴⁶ Katwèna bamanyè mwaba mukwàbò, mutùyekù muye mu sèmìnèrè kampànda kacya to, dilongesha nànsha dyà kânà, dìtùyeku mupetè. Wàkashààla ànu mu nzùbù wa bukalenge wà Pâlò, uvwa mwikale mumpàngaanù awu; kàdi mamwèndè wàkamulongesha. Awu’s mmaamù mulelèlè. Wàkamulongesha mèyi à Mukalenge. Wàkamwambila mùshindù ùvvàye ne cyà kwikala wa cijila. Wàkamwambila mùshindù ne nsòmbelu uvwayè ne cyà kwikala nendè, ne mùshindù, ne cidì Nzambì ne cyà kwenza, civwàye mwa kumwenzela. Nènku cyàkalamata Môsà matükù èndè ônsò à mwoyi.

²⁴⁷ Nènku maamù kanà yônsò mwîmpè, mulelèlè, wa lulamatu ewu wíkala mwà kwangata bânà bëndè, pamutù pà kubàtùma ku sèndèmâ ne ku majà, ne bikwàbò byà mùshindù awu, kàdi

wíkala mwà kubàteka pa bibelu byèndè ne kubàlongèsha maalu àdì àtàngila Mukalenge Yesù Kilistò.

²⁴⁸ Mwab'ewu ditùkù adi, mvwa nyikilangana ne maamù kampànda ku télèfonè. Ki maamù awu kwambayè ne: "Kaa, Mwanèètù Billy," mwàkambaye, "mwanaàanyì wa balùme mukwate ne byà luse ùdi mu lutàtu." Kwambaye ne: "Kaa, lutàtu lwine mùdiye's."

²⁴⁹ Mêmè ne: "Èyowà, ndi mumanyè pa bwalu abu, mwanèètù wa bakàjì, munanga." Ki yéyè ne: "Ùdi mwà kwikala mupiile. Ncyêna mumanyè to." Yéyè ne: "Ewu ùdi wàmба cikampànda ne ewu wàmба cikansanga. Ncyêna mumanyè to. Kàdi," yéyè ne, "nànscha yéyè mwikàle mupiile anyì mubingè, ndi mumunangè." Ki bwalu mbwôbù abu's: "Ndi mumunangè."

²⁵⁰ Wàkambila mamwèndè, wàmба ne: "Mvwa mutàmbe kudìngiibwa kùdi cikampànda ne cikansanga." Kwambayè ne: "Maamù, ndi ngiitabuuja ne munanga wanyì umwèpelè ûndì nendè menemene ngwèwè; mutu mukàjì udi ne lulamatu kûndì, ne mundamâte." Aci's ke dinanga dyà maamù. Awu's ki maamù mulelèlà udi wela mwanèndè mu citupà. Kàyi ùtàngila ne mmubinge anyì mmupiile to, ùdi ànu ùtungunuka ne kuya. Nènku piikala Nzambì... Piikala maamù mwà kwela meeji bu nànkú bwà mwanèndè, munyì mùdì Nzambì mwà kutàmба kwela meeji awu bwà Bèndè. Nudi numònà anyì? Shààla ànu Nendè. Ndààku buludì.

²⁵¹ Nènku mpindyewu lekèlaayi nnwàmbilèku maamù mukwàbò, lükàsàlùkàsà, mu Bible, kumpàlè kwà twêtù kujikija. Kùvwa maamù kampànda ùbiikidiibwa ne Helòdiyà. Ùvwa mulongèshe mwanèndè wa bakàjì bwà kutwà maja. Ùvwa muswè bwà kwikalayè mumanyìke. Ne wàkajà kumpàlè kwà mfùmù kampànda, ne kulòmbayè mutù wà Yone Mubàtiji. Tudi ne luumù lwà ndelàngànyì yèndè makumi mwandamutekète, yà nsongàkàjì ewu wàkajà kumpàlè kwà (mwânà wa bakàjì wa Helòdiyà), wàkajà kumpàlè kwà Helòdè awu; makumi mwandamutekète à ku ndelàngànyì yèndè, bààkafwà anyì bandumbà anyì bowìbwe ku mucì.

²⁵² Maamù umwe wàkalongesha wendè bintu byà pa buloba; maamù mukwàbò wàkalongesha wendè bintu byà Nzambì. Umwe wàkalwa mulombodi munène ne mucimunyi, ùdi kàyi üfwa munkaci mwà bantu leelù ewu to; ne mukwàbò ùdi ndumbà ne ùdi mu ifernò, ne mupulùmùnemù binunu ne binunu. S'nwamònù cîndì muswè kwamba's? "Kolèshìla mwânà mu njila udijè ne cyà kulonda."

²⁵³ Nènku ndi nùtwà nyama ku mikòlò nwènù baamaamù bàdi bakwàte ne byà luse bàdi basòmbe mwab'ewu baase cilòngò cyènù cyà rose citòòke. Kùdi Dyulu dìdi maamù tuyè, leelù ewu, mùdì maamù mwimpè wa citembu uvwa ne mwoyi bwà Nzambi

musòmbèlè, pàmwăpa musabùke dyàmwàmwa dyà cilàmbà cikùdika. Yéyé mmwindile bwà wêwè kulwa. Ncyà bushùwà.

²⁵⁴ Ndi nnùneemeka ne nnùpa luumù mwaba awu nwénù bâdì baase bilòngò byà rose bikùnze munùdì naabì amu. Mamwébè pawìkalà muswe bwà kumwenzela ní ncinyì ní ncinyì, mwenzèlècì matùkù nkàmà yìsàtù ne makumi àsambòmbò ne àtaanù ku cidimu. Ndàaku ku nzùbu kwèndè ùmusambìdilè, ne ikàlà ne mwoyi bwà Nzambì. Ki cintu cyà kwenza ncyôcì aci. Ne ukoleshè bânà bëèbè. Nènku pààkola bëèbè bânà, nebàkubìikile ne: “mubènèshìibwe,” paanyimà pàà wêwè mumanè kusabuka dyàmwàmwa dyà cilàmbà cikùdika. Aci ke nyumà mulelèlà wa buumaamù, nyumà mulelèlà wa ditùkù dyà maamù. Ditùkù dyà maamù dìdi matùkù nkàmà yìsàtù ne makumi àsambòmbò ne àtaanù ku cidimu.

²⁵⁵ Edi nditùkù ditùbo bàsùmbisha bilòngò ne bàsambulujilangana màtàpishi, mùdì bâà pa buloba bènzà. Byôbi ànu bitungùnùke, buloba bwôbò mwà kwenza bìngà bidimu makumi ábìdì kumpàla eku, nebìikalè ne matùkù à mwânà wa balùme, matùkù à mwânà wa bakajì, ne matùkù à mwanèètù wà tàtù mukwàbò, ne matùkù à taatù mukwàbò, ne bintu byônsò byà mùshindù awu abi, ànu bwà kubweja bâà pa buloba mu dibàlakana dyà bungèndàmùshìngà. Ki kùdìbi byèndà biya nkwokü aku, bikabwela too ne mu ifernò, ne bukolè bwônsò mùdìbi mwà kuya amu, ku dibùtuka.

Kàdi, wêwè, Nzambì àkubènèshè, ki disambila dyànyì ndyôdì adi. Tùsambilààyì.

²⁵⁶ Taatù wetù wa kalolo wa mu Dyulu, patùdì tutàngila paanyimà apa, mu dìndà emu, ne meeji ètù, kale wàwa, kùkaadi nkàmà yà bidimu, pàvvà Yéhoshàfàtà mwimàne mwaba awu ku luseke lwà Mfùmù Aakàbà. Ne Nyumà mukesè wa Nzambì, ucìvwaku mushàrà munda mwà mwoyi wèndè, nànsha mùvvàyè mwenze cilèma amu, kumwambilayè, wàmba ne: “Eci ncibi. Eci ncibi. Ki ncikezùkè to. Ki ncyà cijila to. Mupròfetà mmwambe ne bintu ebi kabìvwa mwà kutùngunuka mùshindù ewu nànsha.” Ke Kapyà kakesè kàà Nzambì kumubiìshakù.

²⁵⁷ Ne pàshììshe Wêwè uvwa ne muntu kampàndà bwà kwandamuna Kapyà kakesè aka, mwinè awu ùvwa m’Miikà, mupròfetà mulelèlà wa Nzambì. Nànsha mùvvàbi ne ùvwa mufwànyine kwikala mulwè mwaba awu muvvàla biteetela amu, nànsha mùvvàyè mufwànyine kwikala mulwè mudyombòdiìbwe amu, ne bônsò bwàbò bamubànkàmèène bu musùmbà wà mibwàbwà mitàngile mwânà wa mùkôòkô. Kàdi wàkamba bulelèlà, nànsha mùvvàbo bamubàngùle dipì mu mpàla amu, nànsha mùvvàbo ne cyà kumwela mu bùlokò amu ne kumudiìsha dyàmpà ne mâyì byà kanyinganyinga amu. Kàdi, nànsha nànkú, mèyì àkambàye àkakùmbana, bwalu Wêwè uvwa nendè.

²⁵⁸ Nzambì, enzàku nànku, leelù ewu, ne tudi tutàngila mu Bible ewu. Tudi tutàngila ku mikàndà yà èkèleeziyà, mikenji dikumi, ne bikwàbò, byà èkèleeziyà, mishìngà, ne tumònà mùdìbo bènza *cikampànda*, *cikansanga*, anyì *cikankènga*. Kàdi tutàngilààyi mu Dìyi dilelèlè edi, ne túmonè cìdìDi dyàmba adi: “Kakùyì cijila to, muntu nànsha umwe kààkumònà Mukalenge to. Kebaayi ditalala ne cijila, bwalu, byôbì kabìyikù to, muntu nànsha umwe kààkumònà Mukalenge to. Ewu udi munangè maalu à buloba, anyì bintu byà pa buloba, dinanga dyà Nzambì kadyèna munda mwèndè to.”

²⁵⁹ “Mu matùkù à ku nshìkìdilù bikondo byà njìwù nebìlwé. Bantu nebiìkale badinangi, baditàmbishi, badileeji.” Kaa, bintu binène abi, Mukalenge, bidi munkaci mwà kwenzeka. “Beena mitù mikolè, badibàndishi, banangi bàà bisànkasanka kutàmba kwikalà banangi bàà Nzambì; bàlongesha bantu tunungu twà—twà bantu pamutù pàà mèyì matùma à Nzambì; biikàle ne cimwènekelu cyà difwàrà dyà Nzambì, kàdi bàvila bukolè bwà Nyumà Mwímpè” bwà kuvwija muntu mûlé tèntè ne Nyumà, bwà kumufikisha ku disànka, bwà kumufikisha binsònni ku ditùnkumukabì mu mésù kwèndè, bwà kumufikisha ku dipàtuka bwà kasambidila babèdì, bwà kumufikisha ku dyakula mu myakulu, ne kwandamuna, kumufikisha ku dyamba cipròfetà. Nyumà wa Nzambì awu, Nzambì udi ne mwoyì awu, mbaMuumùshe ànu cyanàànà mu diswa kampànda anyì cintu kampànda cyà mùshindù awu: “Biikàle ne cimwènekelu cyà difwàrà dyà Nzambì, kàdi bàvila bukolè bwàdì.”

²⁶⁰ Éyì Nzambì, swâkù bwà batèèleji bakesè aba, mu ditùkù edi, bàtabulukè lükàsàlùkàsà, mpindyewu mene, kumpàla kwà ndekeelu wa bikondo kulwayè, ne kutùsanganayè mu ngiikàdilù ewu. Twikalèku, bavwjìlbwe bapyabàpyà twêtù biinè, mùdì Bible mwambe ne: “Juuka ùdinyukùlùlè wèwè mwinè. Ne konkà njila wa kale, udi njila mwímpè awu, ne pawàmupeta, wèndelémù.” Nzambì enzàku ne tûpetèku njila mukàyàbàlè wa kale awu, dîbà ditwikalà mwà kwimana pàmwè cyàkàbìdì, bu nkàmà, ne kukwàtangana ku byanza pàmwè ne kwimba misambu.

Nênnondondè njila pàmwè ne banyààbanyà
badyombòdììbwé bàà Mukalenge.
Ngaakabanga lwendu ne Yesù ne nenshìdìmbe
too ne ku ndekeelu.

Nzambì, twambùlwìsheku bwà kwikalà ne nsòmbelu awu ne kwikalà nànku.

²⁶¹ Bèneshàku baamaamù bônsò bàdì basòmbe kaaba aka aba, Mukalenge; bu mutùdì bamanyè ne mbamaamù, bôbò biinè, ne bilòngò bitòòke byasa ku nkooci yàbò, mu dìndà emu, bu civùlukilu cyà maamù munanga mukùlakàje ukààdi muumuke mu cyalu tuyè dyàmwàmwa. Eyì Mfùmù wa Mwoyì,

babènèshékù, Mukalenge. Nènku swâkù bììkalè babènèshìibwe, pààbò, ne swâkù bwà bivùlukilu byà bâàbò bânà bììkalè mùdì bìdìbo naabì bwà mamwábo amu, piìkalàbi ne mmuyè dyàmwàmwà dyà cilùlù cikùdika, ku Dyulu dyà butùmbi. Enzàku nànkú, Mukalenge.

²⁶² Nènku dìndà kampànda piìkalà mwóyi wènda ùdìkànga mu mijilu yètù, ne mweyelu wètù wènda ùpanga kubwela munda mwètù, cilùlù necikangukè; neàpwékè, pàmwápà, too ne ku ndekeelu kwà Yadènè, bwà kutùkwàcisha. Kaa, mu ditùkù dyà butùmbi adi patwàtwà makàsà ètù dyàmwàmwà, mwìkalà kamùyì... Kapeepèlè kakààkwikalala kanyangùke ne mwîshwì wà mfwankà to. Kamwàkwikalala kanwàyì mu mùsèèsù to. Kakwàkwikalakù ndumbà to. Kakwàkwikalakù mpèkaatù to. Kakwàkwikalakù cintu nànsha cìmwè cyà mùshindù awu to. Kàdi, mu cyendèlèlè cyà butùmbi, netwíkalè ne mwóyi ne ditalala pàmwé ne Mukalenge Yesù Kilistò ne bânà bëètù balela. Nènku, kaa, ditùkù dilenga kaayìpu's wè.

²⁶³ Éyì Taatù, pàdì mìdimà minène mikùlùke apa, mvità, ne dyabùlù wènda ùbùcikila matùngá apa, ne wènda ùbùcikila byambilu, wènda ùbùcikila maékèleeziyà, wènda ùbùcikila bantu, wènda ùbùcikila midimu, wènda ùbùcikila bimenga, ne bilongelu ne mbànzà; Éyì Nzambì, tükwàcishèku bwà kwimana, kufyonona mwelé wà mvità ne lukàsalùkàsà bwà kulwangana bwà Nzambì, bu mwàkenza Môsà ne—ne beena Lewì kuntwaku pàvvà mpèkaatù mu citùùdilu apu. Tükwàcishèku, Mukalenge.

²⁶⁴ Tüfwìlèku luse mpindyewu, ne tùbènèshèku. Ne túlamèku badipwekèshe, tükìbùlùlèku, Mukalenge. Éyì Nzambì, Wêwè wâkamba ne: “Ewu udi upàtuka, ùmyamina mamiinu ne binsonji, kakùyì mpatà to neálukilé kàbìdì, wènda ûsànsa, mwambùle myepu.” Éyì Nzambì tükìbùlùlèku tutùpà tutùpà. Tüfwimbèku, cyàkàbìdì, Mukalenge. Tudi tutàmba kupàtukapàtuka mu njila be.

²⁶⁵ Ndi, mêmè mwinè, Mukalenge, ndi mufike mu cipidì cyà ndyèlèla meeji ne mbantu bûngì kaayì bwàbwelà mu disangisha dyànyì. Éyì Nzambì, ndi muswè bwà Wêwè kubwela. Lwâku, Mukalenge! Éyì Kilistò, Iwâku Mukalenge! Ncìbùlùlaaku; mfwimbùlùlè. Éyì Mukalenge, kwitabikù, nànsha byà munyì kùndekèdikù mbweja bintu abi mu meeji ànyì to. Nzambì, bítàdikila ànu kule nàànyì.

²⁶⁶ Nkwàcishèku, Mukalenge, bwà kuyiisha, mûngämbì, kwënji katancì, bu muntu ùpùnga ne lufù kùdi bantu bàdì bâpùnga ne lufù, bamanyè ne twêtù bônsò tudi ne cyà kukùngamangana ne Cyendèlèlè. Tudi ne cyà kwimana kumpàla Kwèbè; dîbà dyûdì Kuyì mu ngenzèlù Wêbè wa musàngeelu, dîbà Dyûdì kuyì ne luse, dîbà Dyûdì mwimàne kuyì ne luse; dîbà Dyûdì mwimàne, ne ciiji, bwà kutwàla dinyooka pa matùngá ne pa bantu bàdì babènge ne badyombòle dinanga dyà Mwânà Webè.

²⁶⁷ Nzambì, mpèèshèku luse pàmwè Nendè leelù ewu, bwà ne mu Ditùkù adi ndi mwà kwimana ne ditwishiibwa. Tudi mwà kwikalà ne cya kudila mpindyewu, kàdi Wêwè neùbikùpùle, bwà kulwabì dissàンka, mu dìbà adi, paWàmbà ne: “Bwelààyi mu masànkà à Mukalenge, àdì manùlongolwela kacya ku difùkà dyà dyulu ne buloba.” Nzambì, ikàlàku neetù mpindyewu, ne tükwàcìshèku, tudi tulòmba, mu Dînà dyà Yesù. Amen. 

54-0509 Dibùcikila Dyà États-Unis
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabéji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org